

**MESYUARAT KETIGA, PENGGAL KEDUA
PARLIMEN KEEMPAT BELAS**

2019

HARI ISNIN : 7 OKTOBER 2019

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI ANWAR IBRAHIM
[PORT DICKSON]**

TARIKH : 7 OKTOBER 2019 (ISNIN)

SOALAN : 1

Dato' Seri Anwar bin Ibrahim [Port Dickson] Minta PERDANA MENTERI menyatakan apakah langkah dan tindakan yang diambil oleh Kerajaan berkenaan dengan laporan yang dinyatakan oleh Pelapor Khas Pertubuhan Bangsa-Bangsa Bersatu (PBB) Berhubung Kemiskinan Tegar dan Hak Asasi Manusia, Prof. Philip Alston terhadap kadar kemiskinan negara yang kian meruncing.

**JAWAPAN: YAB TUN DR. MAHATHIR MOHAMAD
PERDANA MENTERI**

Tuan Yang di-Pertua,

1. Izinkan saya untuk menjawab pertanyaan berkaitan isu kadar kemiskinan di Malaysia ini secara bersekali dengan 16 soalan yang diutarakan oleh Ahli-Ahli Yang Berhormat yang berikut kerana menyentuh soal yang sama:

- i. YB Kangar akan dijawab pada 07 Oktober 2019;
- ii. YB Petrajaya akan dijawab pada 10 Oktober 2019;
- iii. YB Klang akan dijawab pada 22 Oktober 2019;
- iv. YB Hulu Terengganu akan dijawab pada 29 Oktober 2019;
- v. YB Padang Serai akan dijawab pada 04 November 2019;
- vi. YB Kuala Kedah akan dijawab pada 07 November 2019;
- vii. YB Kota Melaka akan dijawab pada 13 November 2019;

- viii. YB Kota Kinabalu dan YB Ledang akan dijawab pada 19 November 2019;
- ix. YB Kluang dan YB Selayang akan dijawab pada 25 November 2019; dan
- x. YB Mersing, YB Bukit Bendera, YB Kepala Batas, YB Julau dan YB Libaran akan dijawab pada 28 November 2019.

Tuan Yang di-Pertua,

2. Laporan *End of Mission Statements* oleh Pelapor Khas Pertubuhan Bangsa-Bangsa Bersatu (PBB), Profesor Philip Alston telah mengundang pelbagai reaksi dalam kalangan masyarakat. Kerajaan mengambil maklum laporan tersebut namun perlu dijelaskan di sini bahawa kadar kemiskinan rasmi di Malaysia dikira berdasarkan cerapan data Tinjauan Pendapatan Isi Rumah (HIS – *Household Income Survey*). Ia dilakukan mengikut piawaian amalan antarabangsa yang diselenggara oleh Bahagian Statistik PBB (UNSD – United Nation Statistic Division).
3. Sehubungan itu, perangkaan kemiskinan daripada HIS masih relevan dan boleh dipercayai pada peringkat penilaian makro. Namun, pada peringkat yang lebih mikro seperti negeri atau daerah, perangkaan HIS perlu diguna secara berhati-hati kerana ia tidak menggambarkan corak penggunaan, keperluan serta demografi sebenar isi rumah berikutan ralat persampelan yang tidak boleh dielakkan.
4. Menyedari hakikat ini, Kerajaan sebenarnya telahpun memulakan kajian semula Pendapatan Garis Kemiskinan (PGK) sejak bulan Mac 2019. Pelaksanaan kajian ini sedang giat dijalankan dengan kerjasama Jabatan Perangkaan Malaysia, Kementerian Kesihatan Malaysia serta jabatan dan agensi berkaitan. Saya juga telah mengarahkan Kementerian Hal Ehwal Ekonomi agar meneliti laporan *End of Mission Statements* oleh Pelapor Khas PBB tersebut.
5. Dalam Kajian Separuh Penggal Rancangan Malaysia Ke-11, Kerajaan telah memperkenalkan Indeks Kemiskinan Pelbagai Dimensi

(MPI – *Multi-Dimensional Poverty Index*). Ia sebagai pelengkap kepada PGK untuk mengukur dan memantau kemiskinan dalam perspektif pelbagai dimensi yang merangkumi kesihatan, pendidikan, pendapatan dan taraf hidup. MPI ini dilihat lebih inklusif selaras dengan amalan antarabangsa.

Tuan Yang di-Pertua,

6. Kerajaan bersedia untuk menyemak semula PGK ini bagi memberi gambaran sebenar isu kemiskinan di Malaysia. Namun apa yang lebih penting adalah usaha-usaha pembasmian kemiskinan dilaksanakan secara berterusan dan efektif.
7. Antara usaha yang telah dan sedang dilaksanakan oleh Kerajaan ialah dengan mengemaskini dan menambah baik sistem eKasih yang menjadi pangkalan data kemiskinan nasional. eKasih akan turut mengambil kira bilangan ahli dan keperluan isi rumah supaya pemberian bantuan menepati keperluan dan kumpulan sasar. Mekanisme pengumpulan data dan formulasi strategi juga akan ditambah baik dengan memanfaatkan perkembangan teknologi terkini.
8. Strategi utama Kerajaan dalam membasmi kemiskinan adalah melalui usaha meningkatkan pendapatan dan kuasa beli rakyat terutamanya dalam kalangan isi rumah miskin dan berpendapatan rendah. Antara bantuan kepada kumpulan sasar ini termasuklah Bantuan Sara Hidup, kemudahan pemilikan perumahan, akses kepada pendidikan dan kesihatan yang berkualiti. Usaha-usaha ini akan dapat memastikan setiap isi rumah diberi perhatian sewajarnya sejajar dengan konsep pembangunan inklusif Wawasan Kemakmuran Bersama 2030.

Sekian, terima kasih.

PEMBERITAHUAN PERTANYAAN
MESYUARAT KETIGA, PENGGAL KEDUA
PARLIMEN KEEMPAT BELAS DEWAN RAKYAT

PERTANYAAN : **LISAN**
TARIKH : **7 OKTOBER 2019 (ISNIN)**
DARIPADA : **DATO' SERI HAJI ABDUL HADI BIN AWANG [MARANG]**

SOALAN

DATO' SERI HAJI ABDUL HADI BIN AWANG [MARANG] minta **PERDANA MENTERI** menyatakan apakah langkah Kerajaan melalui Wawasan Kemakmuran Bersama 2021-2030 untuk merapatkan jurang ekonomi dan sosial di antara orang Melayu Bumiputera dengan bukan Bumiputera.

JAWAPAN: **YAB TUN DR. MAHATHIR MOHAMAD**
 PERDANA MENTERI

Tuan Yang di-Pertua,

1. Izinkan saya untuk menjawab pertanyaan berkaitan Wawasan Kemakmuran Bersama secara bersekali dengan 3 soalan yang diutarakan oleh Ahli-Ahli Yang Berhormat yang berikut:

- i. YB Pasir Gudang akan dijawab pada 07 Oktober 2019;
- ii. YB Masjid Tanah akan dijawab pada 16 Oktober 2019; dan
- iii. YB Batang Lutar akan dijawab pada 07 November 2019;

Tuan Yang di-Pertua,

2. Kerajaan menyedari perbezaan jurang pendapatan yang ketara di antara golongan yang kaya dengan yang miskin boleh mencetuskan keadaan yang tidak harmoni di dalam negara. Ia akan bertambah buruk lagi sekiranya perbezaan ini terkait dengan kaum yang berlainan. Masalah ini telah membelenggu negara sejak merdeka lagi.

NO. SOALAN : 2

3. Sehubungan itu, pada tahun 1970-an, Kerajaan telah melancarkan program pembangunan 20 tahun yang dikenali sebagai Dasar Ekonomi Baru (DEB). Objektif utama DEB ialah mewujudkan perpaduan nasional melalui penyusunan semula masyarakat dan pembasmian kemiskinan. Segala program pembangunan negara dan dasar Kerajaan yang diperkenalkan ketika itu dirancang dan dilaksanakan untuk mencapai objektif tersebut.

4. Selepas 20 tahun pelaksanaan DEB, saya telah mengumumkan Wawasan 2020 yang mengandungi satu pemikiran dan rangka kerja mengenai matlamat Malaysia menjadi sebuah negara maju mengikut acuan sendiri pada tahun 2020. Malangnya, walaupun kita bekerja keras siang dan malam, saya tidak fikir kita boleh mencapainya pada tahun 2020. Kegagalan ini berpunca daripada pelaksanaan dasar yang tidak sesuai dengan matlamat asal Wawasan 2020 oleh Kerajaan PM ke-5 dan ke-6. Namun begitu, tidak dinafikan terdapat sedikit pencapaian dalam bidang-bidang tertentu. Contohnya, bilangan profesional kini lebih ramai berbanding dahulu dan pendapatan isi rumah secara perbandingannya juga telah meningkat.

Tuan Yang di-Pertua,

5. Walaupun ekonomi negara berkembang dalam tempoh berkenaan, pengagihannya tidak seimbang di setiap peringkat kumpulan pendapatan, etnik, wilayah dan rantaian bekalan. Ini diburukkan lagi dengan pentadbiran Kerajaan terdahulu yang dicengkam oleh masalah ketirisan, penyalahgunaan kuasa dan rasuah.

6. Justeru, untuk mengatasi kepincangan ini, Wawasan Kemakmuran Bersama telah diperkenalkan. Kerajaan kini tidak lagi melihat pembangunan mengikut ukuran pertumbuhan ekonomi atau Keluaran Dalam Negara Kasar (KDNK) semata-mata. Kita melihat pembangunan dari aspek peningkatan kuasa beli rakyat dan pembangunan perlu dinikmati oleh semua rakyat atau "*shared prosperity*". Ini bermakna tidak wujud jurang pendapatan yang terlalu lebar antara miskin dengan kaya, antara kaum dengan suku kaum dan antara wilayah luar bandar dengan bandar. Tidak harus ada golongan yang merasakan mereka terpinggir dari arus perdana pembangunan.

NO. SOALAN : 2

Tuan Yang di-Pertua,

7. Realitinya, setelah hampir 50 tahun pelaksanaan DEB dan Wawasan 2020, masalah ketidakseimbangan pendapatan dan kekayaan antara Bumiputera dengan bukan Bumiputera masih wujud. Ini boleh menyebabkan kegelisahan dan ketegangan kaum, sekaligus, merencatkan pertumbuhan ekonomi negara dan aspirasi perpaduan nasional.

8. Oleh itu, usaha bagi mengatasi masalah ini perlu diteruskan dengan pendekatan baharu. Kalau dahulu, Kerajaan memberi fokus kepada peningkatan bilangan peluang berdasarkan prinsip Kesaksamaan Peluang (**Equitability Of Opportunities**) untuk Bumiputera, terutamanya dalam bidang ekonomi dan pendidikan. Kini, aspek keberhasilan pencapaian berdasarkan prinsip Kesaksamaan Keberhasilan (**Equitability Of Outcomes**) kepada Bumiputera turut diberi penekanan dalam Wawasan Kemakmuran Bersama. Peluang akan diberikan kepada Bumiputera yang membuktikan kelayakan dan kemampuan mereka. Bagi yang masih belum layak dan mampu pula, bantuan, latihan serta sokongan sewajarnya akan diberikan bagi meningkatkan peluang kejayaan mereka. Melalui pendekatan ini, Kerajaan berhasrat melahirkan generasi Bumiputera baharu yang berpegang teguh kepada nilai moral integriti, bersikap rajin berusaha dan bermaruah dan juga bersemangat kental nasionalis yang ingin menyelamat negara dan tidak bergantung kepada orang asing. Mereka juga akan anggap kerja sebagai sesuatu yang mulia.

Tuan Yang di-Pertua,

9. Wawasan Kemakmuran Bersama ini tidak seharusnya disempitkan daripada sudut agenda pemerkasaan ekonomi Bumiputera sahaja. Ia sebenarnya merupakan panduan penetapan dasar, strategi dan inisiatif rancangan pembangunan jangka masa pendek, sederhana dan panjang negara. Matlamat akhir segala usaha Kerajaan ini adalah untuk memastikan seluruh rakyat Malaysia tanpa mengira kaum mencapai taraf hidup wajar atau “*decent standard of living*” menjelang tahun 2030.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATO' JOHARI BIN ABDUL [SUNGAI PETANI]

TARIKH : 7 OKTOBER 2019 (ISNIN)

SOALAN

Minta **MENTERI HAL EHWAL EKONOMI** menyatakan dalam menyediakan Draf Rancangan Malaysia Ke-12 (RMK-12) adakah Kerajaan sudah mengenal pasti punca-punca utama kegagalan negara mencapai taraf negara maju pada tahun 2020, jika sudah dikenal pasti, apakah usaha untuk tidak ulangi kesilapan ini.

JAWAPAN

Tuan Yang di-Pertua,

1. Bagi menjawab pertanyaan YB Sungai Petani berkenaan punca-punca kegagalan untuk mencapai status negara maju pada tahun 2020, Kerajaan telah pun mengenal pasti punca-punca utama dengan melihat faktor dalaman dan faktor luaran.

2. Antara faktor dalaman utama adalah berkaitan dengan struktur ekonomi negara yang tidak banyak berubah. Pertumbuhan ekonomi negara masih belum digembbleng sepenuhnya bagi mencapai potensi sebenar. Sumber pertumbuhan ekonomi juga masih bergantung kepada faktor tradisional seperti modal dan buruh, dan bukannya peningkatan produktiviti yang dapat memastikan pertumbuhan yang lebih mampan. Manakala, sebahagian besar industri pula masih berada dalam kategori nilai ditambah yang rendah disebabkan kadar penggunaan teknologi

tinggi yang masih rendah, iaitu sebanyak 37% dalam sektor pembuatan dan 20% dalam sektor perkhidmatan.

3. Di samping itu, struktur pasaran buruh yang masih bergantung kepada pekerja separa mahir dan berkemahiran rendah telah menyebabkan kurangnya pewujudan pekerjaan berpendapatan tinggi. Malahan, kebergantungan kepada pekerja asing yang berterusan turut menjasakan kadar gaji dan upah dalam pasaran buruh. Ini menyebabkan bahagian pampasan pekerja kepada Keluaran Dalam Negeri Kasar (KDNK) masih rendah iaitu sebanyak 35.7% berbanding negara maju seperti Jerman 51.5%, United Kingdom 49.4% dan Korea Selatan 45.7% pada tahun 2018.

4. Selain itu, pembangunan aktiviti ekonomi yang mempunyai nilai ditambah tinggi lebih tertumpu di negeri yang maju berbanding negeri yang kurang membangun. Pada tahun 2018, Wilayah Persekutuan Kuala Lumpur dan Selangor telah menyumbang 40% kepada KDNK negara. Pemusatan pembangunan ekonomi di Wilayah Persekutuan Kuala Lumpur dan Selangor telah melebarkan lagi ketidakseimbangan pembangunan antara negeri dan dalam kalangan wilayah.

5. Ekonomi negara juga turut terdedah kepada beberapa faktor luaran memandangkan Malaysia merupakan sebuah ekonomi yang kecil dan terbuka dengan jumlah perdagangan sebanyak 130% kepada KDNK. Antara punca yang menyebabkan ekonomi Malaysia menyederhana termasuklah kelembapan ekonomi dunia dan perdagangan global, terutamanya kesan daripada ketegangan perdagangan antara Amerika Syarikat dan China yang turut melibatkan rakan perdagangan utama negara. Selain itu, harga komoditi yang tidak menentu, keadaan kewangan global yang lebih ketat dan ketidaktentuan geopolitik turut mempengaruhi pertumbuhan ekonomi negara.

Tuan Yang di-Pertua,

6. Kerajaan telah merangka strategi yang lebih holistik sepetimana yang telah dibentangkan dalam Wawasan Kemakmuran Bersama 2030 yang bermula daripada tahun 2021 hingga 2030 akan dilaksanakan dalam dua Rancangan Malaysia iaitu RMKe-12 dan RMKe-13. Antara strategi yang akan dilaksanakan Kerajaan untuk menstuktur semula ekonomi adalah dengan memberi tumpuan untuk menarik pelaburan yang berkualiti yang akan mewujudkan lebih banyak peluang pekerjaan berkemahiran tinggi.
7. Selain memperkuuhkan sektor pertumbuhan ekonomi sedia ada, tumpuan juga akan diberi untuk mempergiat aktiviti pertumbuhan ekonomi masa hadapan yang bernilai tinggi dan mempunyai potensi untuk berkembang pesat sejajar dengan perubahan teknologi.
8. Di samping itu, bagi merapatkan jurang antara wilayah, pembangunan akan dibawa ke seluruh negara terutamanya negeri yang kurang membangun. Bagi memastikan kejayaan untuk mengurangkan jurang pembangunan antara wilayah, Kementerian Hal Ehwal Ekonomi telah melaksanakan sesi libat urus bersama semua Kerajaan Negeri sebagai satu pendekatan baharu yang diambil di bawah RMKe-12 agar dasar yang akan dibentuk lebih holistik dan inklusif.
9. Kerajaan yakin Wawasan Kemakmuran Bersama akan berjaya membentuk Malaysia sebagai sebuah negara yang bersatu, makmur dan bermaruah, seterusnya muncul sebagai paksi ekonomi Asia.

Sekian, terima kasih.

**PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS DEWAN RAKYAT**

PERTANYAAN : LISAN

DARIPADA : TUAN KHAIRY JAMALUDDIN [REMBAU]

TARIKH : 7 OKTOBER 2019 (ISNIN)

SOALAN

Tuan Khairy Jamaluddin [Rembau] minta **MENTERI INDUSTRI UTAMA** menyatakan sejauh manakah Majlis Negara-Negara Pengeluar Minyak Sawit (CPOPC) yang ditubuhkan oleh Malaysia dan Indonesia memainkan peranannya bagi mengatasi aktiviti pembukaan tanah ladang menerusi pembakaran terbuka oleh syarikat pemain industri sawit yang telah menyebabkan masalah jerebu rentas sempadan saban tahun.

JAWAPAN

Tuan Yang Dipertua,

Aktiviti pembukaan tanah adalah dipantau dan dikawal selia oleh kementerian tertentu di negara masing-masing dan bukan di bawah seliaan Majlis Negara-Negara Pengeluar Minyak Sawit (CPOPC). Malah, di Malaysia, ianya melibatkan kuasa di bawah Kerajaan Negeri.

Namun begitu, CPOPC yang ketika ini dianggotai oleh Malaysia, Indonesia dan Colombia telah ditubuhkan bertujuan antaranya adalah untuk memantapkan lagi amalan persekitaran mampan, pengurusan bekalan, aktiviti promosi dan pembangunan pekebun-pekebun kecil.

Melalui CPOPC, Malaysia dan Indonesia telah memberikan komitmen untuk memastikan pengeluaran minyak sawit dan produk-produk berasaskan sawit dilaksanakan secara mampan. Amalan penanaman lestari ini adalah menepati standard pensijilan Minyak Sawit Mampan

SOALAN NO : 4

Malaysia (MSPO) dan pensijilan Minyak Sawit Mampan Indonesia (ISPO) termasuk menghalang pembakaran secara terbuka.

Usaha berterusan ini juga akan diperhalusi dalam *Palm Oil Supply and Demand Outlook Conference* (POSDOC) yang dianjurkan oleh CPOPC pada 22 Oktober 2019 di Bandar Baru Bangi. Persidangan yang akan dihadiri oleh penggiat industri sawit dari Malaysia dan Indonesia akan membincangkan tiga aspek utama berkaitan industri sawit iaitu pengeluaran, permintaan pasaran dan unjuran harga termasuk isu alam sekitar yang merentasi sempadan.

Pada masa yang sama, Kementerian Industri Utama selaku kementerian yang bertanggungjawab kepada industri sawit di negara ini telah berbincang dengan Kerajaan Indonesia mengenai isu ini. Kementerian akan mengambil tindakan yang sewajarnya ke atas ladang-ladang kepunyaan Malaysia yang terlibat dalam aktiviti pembakaran terbuka di negara Indonesia jika terbukti ianya benar-benar berlaku.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI IKMAL HISHAM BIN ABDUL AZIZ
(TANAH MERAH)**

TARIKH : 7 OKTOBER 2019 (ISNIN)

SOALAN NO. 5

Minta **MENTERI BELIA DAN SUKAN** menyatakan dalam usaha meningkatkan mutu bola sepak negara, berapa ramai lagikah pemain naturalisasi akan diserap menyertai pasukan Harimau Malaya.

JAWAPAN

Tuan Yang di-Pertua,

1. Untuk makluman Ahli Yang Berhormat, pihak Kementerian sentiasa memberi perhatian terhadap pembangunan sukan bola sepak negara dan sentiasa terbuka untuk membantu perkembangan prestasi skuad kebangsaan.
2. Pelaksanaan Program Pembangunan Bola Sepak Negara (PPBN) atau *National Football Development Programme* (NFDP) bagi Fasa 1 bermula pada tahun 2014 hingga 2020 manakala Fasa 2 dijadual bermula pada tahun 2021 hingga 2030. Penambahbaikan PPBN dibuat berdasarkan *Blueprint* PPBN 2019–2025 yang telah disediakan pada awal tahun ini. Sebanyak tujuh (7) inisiatif telah diperkenalkan iaitu memperkemaskan struktur kejurulatihan, penubuhan jawatankuasa pelaksana, skim gaji yang lebih berstruktur, modul pendidikan persendirian untuk Akademi Bola Sepak Negara Mokhtar Dahari (AMD), perancangan pemain selepas umur 17 tahun, kerjasama pemegang taruh dan pemain naturalisasi.
3. Untuk makluman Ahli Yang Berhormat, sehingga kini seramai empat (4) orang pemain telah melalui proses naturalisasi dan turut menyarung jersi kebangsaan di kejohanan-kejohanan utama yang dipertandingkan bermula pada tahun 2014. FAM juga turut mengesahkan dua (2) lagi pemain naturalisasi akan menyarung jersi kebangsaan setelah menerima kelulusan daripada pihak Konfederasi Bola Sepak Antarabangsa (FIFA).
4. Pihak FAM juga akan terus mengkaji dan mempertimbangkan keperluan kaedah naturalisasi ini dari semasa ke semasa berdasarkan kepada peluang-peluang yang ada melalui tiga (3) mekanisme tersebut bagi memastikan prestasi pasukan negara terus meningkat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK SERI HAJI AHMAD BIN HAJI
MASLAN [PONTIAN]**

TARIKH : 07 OKTOBER 2019 (ISNIN)

SOALAN

Minta **MENTERI SUMBER MANUSIA** menyatakan peratus pengangguran di kalangan belia dan graduan serta langkah-langkah yang sudah diambil bagi memastikan jumlah pekerjaan adalah mencukupi dan sesuai dengan kelulusan dan kemahiran belia. Nyatakan juga langkah untuk mengurangkan pembuangan pekerja dan berapakah angka terkini mengikut pecahan industri.

JAWAPAN

Tuan Yang di-Pertua,

1. Berdasarkan Survei Tenaga Buruh (STB) 2018, kadar pengangguran belia (15 hingga 30 tahun) ialah 6.8 peratus. Sebagai usaha bagi membantu belia mendapatkan pekerjaan, Kerajaan telah melaksanakan usaha-usaha berikut:-

- (i) Menyediakan perkhidmatan pekerjaan *JobsMalaysia* yang memberi kemudahan kepada pencari kerja untuk mendapatkan kerja yang bersesuaian melalui pendekatan pemadanan kerja.
- (ii) Menganjurkan Program Penempatan Pekerjaan yang merangkumi Karnival Kerjaya, penempatan melalui *Client Account*, Temuduga Terbuka, Program Kerjasama Antara Agensi, *Holiday Placement For Students* (HOPS), Penempatan Dengan Kerjasama APS, Program Penempatan Golongan Khas serta Program Penyesuaian Kerjaya (2PK). Program-program ini telah diadakan dari semasa ke semasa bagi menemukan pencari kerja dengan majikan yang sepadan. Bagi tempoh Januari-Ogos 2019, seramai 61,871 orang pencari kerja telah berjaya mendapat penempatan;
- (iii) Mewujudkan pusat sehenti menggabungkan agensi seperti *JobsMalaysia*, Pertubuhan Keselamatan Sosial (PERKESO), Pembangunan Sumber Manusia Berhad (PSMB) dan Unit Peneraju Agenda Bumiputera (TERAJU), Jabatan Perdana Menteri.
- (iv) Melaksanakan program *Graduates Enhancement Programme For Employability* (GENERATE 2.0) bertujuan membantu golongan muda di kalangan graduan menganggur untuk mengikuti latihan dalam bidang berimpak tinggi

SOALAN NO : 6

bersesuaian dengan keperluan industri dan seterusnya diberikan jaminan penempatan pekerjaan di syarikat yang berdaftar dengan Pembangunan Sumber Manusia Berhad (PSMB).

- (v) Mengukuhkan dan memperkasakan Program Sistem Latihan *Dual Nasional* (SLDN) melalui pelbagai program dan kerjasama bagi mengurangkan jurang ketidakpadanan kemahiran dengan keperluan industri.
- (vi) Melaksanakan program *Structured Internship Programme* (SIP) yang diterajui Talent Corp dengan kerjasama Kementerian Pendidikan Malaysia (KPM).
- (vii) Memperluas akses kepada warga negara untuk mendapat Latihan dan Pendidikan Teknikal dan Vokasional (TVET). Sehingga kini, terdapat 562 buah Institusi Latihan Kemahiran Awam (ILKA) yang telah ditubuhkan di seluruh negara dengan pelbagai kursus kemahiran ditawarkan mengikut keperluan industri; dan
- (viii) Menyediakan program *upskilling* dan *reskilling* kepada golongan pelajar kemahiran dan pekerja bagi mempertingkatkan kemajuan kendiri dalam menyesuaikan diri dengan perubahan keperluan kerja masa hadapan (*future jobs*) serta persekitaran yang semakin kompetitif dan dinamik.

Tuan Yang Di Pertua,

2. Berdasarkan laporan pemberhentian oleh majikan yang diterima oleh Jabatan Tenaga Kerja (JTK), jumlah pemberhentian pekerja bagi tempoh Januari hingga September 2019 adalah seramai 24,600 orang dengan sektor pembuatan mencatatkan

SOALAN NO : 6

kehilangan pekerjaan tertinggi iaitu seramai 7,944 orang.

3. Bagi membantu pekerja yang diberhentikan, Kerajaan telah mengambil langkah-langkah berikut :

- (i) Memperkenalkan Sistem Insurans Pekerjaan (SIP) mulai 1 Januari 2018 sebagai satu bentuk perlindungan keselamatan sosial kepada golongan pekerja yang kehilangan pekerjaan.
 - (ii) Pihak majikan dikehendaki melaporkan kepada Jabatan Tenaga Kerja (JTK) sekiranya ingin melaksanakan pemberhentian pekerja.
 - (iii) Kerajaan telah menetapkan melalui Akta Kerja 1955 bahawa sekiranya majikan mahu melaksanakan pengurangan pekerja, majikan dikehendaki memberhentikan pekerja asing terlebih dahulu sebelum memberhentikan pekerja tempatan.
4. Kerajaan yakin semua langkah yang telah dilaksanakan dapat membantu rakyat mendapatkan pekerjaan dan mengurangkan lagi kadar pengangguran negara.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KE-EMPAT BELAS**

PERTANYAAN : LISAN

DARIPADA : Y.B. DATO' NGEH KOO HAM [BERUAS]

TARIKH : 7 OKTOBER 2019 (ISNIN)

SOALAN

Minta **MENTERI PENGANGKUTAN** menyatakan rancangan Kerajaan untuk memperluas lapangan terbang atau membina lapangan terbang baru untuk memenuhi keperluan yang kian bertambah bagi kawasan utara Semenanjung Malaysia, iaitu negeri Perak, Pulau Pinang, Kedah dan Perlis .

JAWAPAN

Yang di-Pertua,

1. Untuk makluman Yang Berhormat, bagi memenuhi keperluan yang kian bertambah bagi kawasan utara Semenanjung Malaysia, iaitu negeri Perak, Pulau Pinang, Kedah dan Perlis, Kerajaan mempunyai perancangan untuk menaiktaraf Lapangan Terbang Antarabangsa Pulau Pinang (LTAPP) dan Lapangan Terbang Antarabangsa Langkawi (LTAL).
2. Lapangan Terbang Antarabangsa Pulau Pinang (LTAPP) akan dinaiktaraf dengan kapasiti pengendalian penumpang terminal ditingkatkan daripada 6.5 juta penumpang setahun kepada 12 juta penumpang setahun bagi Fasa Pertama. Pelaksanaan peringkat pertama Fasa Kedua dengan kapasiti pengendalian penumpang seramai 16 juta penumpang setahun dan pelaksanaan peringkat kedua bagi kapasiti 20 juta penumpang setahun, masih dalam perancangan Kerajaan kerana ianya melibatkan kerja-kerja pengambilan tanah.
3. Kerajaan telah menaiktaraf Lapangan Terbang Antarabangsa Langkawi (LTAL) dengan meningkatkan kapasiti pengendalian terminal daripada 1.5 juta penumpang setahun kepada 4 juta penumpang setahun. Projek ini telah selesai dilaksanakan pada Ogos 2018. Kerajaan mempunyai perancangan untuk menaiktaraf fasiliti di Terbang Antarabangsa Langkawi (LTAL) terutama dengan menyediakan kemudahan aerobridge bagi melancarkan lagi pengendalian syarikat-syarikat penerbangan yang menggunakan pesawat jenis wide body seperti B787 turut beroperasi di LTAL.
4. Selain itu, Kerajaan melalui Kementerian Hal Ehwal Ekonomi (MEA) juga telah mengumumkan persetujuan berhubung cadangan pembinaan Lapangan Terbang Antarabangsa Kulim (KXP) melalui kaedah pelaburan swasta. Walau bagaimanapun, cadangan ini masih di peringkat awal dan sedang melalui proses-proses yang berkaitan sebelum ia dilaksanakan.

NO. SOALAN : 7

5. Buat masa ini juga, Kerajaan telah dimaklumkan oleh Kerajaan Negeri Perak berhubung hasratnya untuk menaiktaraf Lapangan Terbang Sultan Azlan Shah, Ipoh (LTSAS). Projek ini melibatkan skop pemanjangan landasan bagi menampung penerbangan antarabangsa khususnya daripada China dan India. Walau bagaimanapun, perkara ini masih dalam perbincangan di antara Kerajaan Negeri Perak dengan Kerajaan Persekutuan.
6. Kerajaan mengambil pendekatan bersifat terbuka dalam sebarang cadangan daripada mana-mana pihak untuk membantu merancakkan ekonomi negara termasuk cadangan untuk membina lapangan terbang baharu di Wilayah Utara. Pendirian Kerajaan adalah untuk menyokong pertumbuhan industri logistik dan pelancongan di Wilayah Utara. Sehubungan itu, sebarang cadangan berhubung pembinaan lapangan terbang baharu akan diteliti dengan mengambil kira peranan dan kapasiti lapangan-lapangan terbang sedia ada yang berdekatan.
7. Pada ketika ini, Kementerian Pengangkutan melalui Suruhanjaya Penerbangan Malaysia (MAVCOM) sedang menjalankan kajian bagi menyediakan dokumen National Airports Strategic Plan (NASP). Dokumen ini akan dijadikan sebagai rujukan pihak Kerajaan dalam merancang dan mempertimbangkan cadangan pembangunan lapangan-lapangan terbang di Malaysia.
8. Secara amnya, NASP akan menggariskan pelan pembangunan jangka panjang bagi membangunkan sistem lapangan terbang yang lebih efisyen dan berdaya saing, serta berkesinambungan dengan jaringan pengangkutan dan perhubungan pelbagai mod pengangkutan di dalam Malaysia. Kajian yang mengambil masa selama 18 bulan ini dijangka akan dimuktamadkan selewat-lewatnya pada Disember 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI REEZAL MERICAN BIN NAINA
MERICAN [KEPALA BATAS]**

TARIKH : 7 OKTOBER 2019 (ISNIN)

SOALAN

DATO' SRI REEZAL MERICAN BIN NAINA MERICAN [KEPALA BATAS] minta **MENTERI WILAYAH PERSEKUTUAN** menyatakan status dan keputusan terkini Majlis Perancangan Fizikal Negara (MPFN) berkenaan pelaksanaan projek Pelan Induk Tambakan Laut Selatan Pulau Pinang (PSR).

JAWAPAN

Jawapan ini akan dijawab bersekali untuk soalan-soalan berikut:-

- 1) Pertanyaan lisan nombor 8 oleh Yang Berhormat Jerai pada 13 November 2019;
- 2) Pertanyaan lisan nombor 10 oleh Yang Berhormat Sik pada 13 November 2019; dan
- 3) Pertanyaan lisan nombor 7 oleh Yang Berhormat Pendang pada 19 November 2019.

SOALAN NO : 8

Tuan Yang Di Pertua,

Izinkan saya menjawab soalan nombor 8 pertanyaan daripada Yang Berhormat Kepala Batas, bertarikh 7 Oktober, soalan nombor 8 pertanyaan daripada Yang Berhormat Jerai dan soalan nombor 10 pertanyaan daripada Yang Berhormat Sik bertarikh 13 November serta soalan nombor 7 pertanyaan daripada Yang Berhormat Pendang bertarikh 19 November 2019 bersekali memandangkan keempat-empat soalan ini adalah saling berkait.

Untuk makluman Ahli-Ahli Yang Berhormat, Kementerian Wilayah Persekutuan (KWP) melalui PLANMalaysia (Jabatan Perancangan Bandar dan Desa) telah menerima permohonan dari Kerajaan Negeri Pulau Pinang untuk mengangkat Cadangan Pembangunan *Penang South Reclamation* (PSR) untuk mendapat nasihat Mesyuarat Majlis Perancang Fizikal Negara (MPFN) yang dipengerusikan oleh YAB Perdana Menteri.

Suka dijelaskan bahawa, MPFN **memandang serius** terhadap pembangunan tebus guna secara besar-besaran ini yang mempunyai pelbagai isu yang perlu diberi perhatian oleh Kerajaan Negeri. **MPFN tidak membuat sebarang kelulusan atau persetujuan ke atas projek tersebut tetapi telah menasihati Kerajaan Negeri melalui 18 nasihat** yang telah digariskan, beserta dengan ulasan dan nasihat-nasihat tambahan yang telah dikemukakan oleh beberapa Kementerian.

Kerajaan Negeri telah dinasihatkan untuk terus mengadakan perundingan bersama masyarakat setempat dan rakyat yang akan terkesan daripada pembangunan ini dan memastikan keperluan-keperluan mereka diberi perhatian sewajarnya.

Tuan Yang Di Pertua dan Ahli-Ahli Yang Berhormat,

Laporan **Penilaian Impak Sosial (SIA)** juga telah dibentangkan dalam **Mesyuarat Panel Penilai Laporan Penilaian Impak Sosial Ke-15 (Bil. 4/2019)** pada 17 Mei 2019, yang telah **bersetuju untuk meluluskan**

SOALAN NO : 8

dengan syarat dibuat beberapa penambahbaikan ke atas laporan tersebut. Setelah beberapa penambahbaikan dibuat, laporan SIA tersebut akhirnya **telah diluluskan pada 29 Ogos 2019**. Walaubagaimanapun, kelulusan SIA ini juga **tertakluk kepada kelulusan Laporan Penilaian Impak Alam Sekeliling (EIA) dan kelulusan Fisheries Impact Assessment (FIA)** kerana skop impak sosial adalah berhubungkait rapat dengan skop impak alam sekitar dan impak pembangunan terhadap sektor perikanan.

Antara langkah-langkah mitigasi yang telah dipersetujui melalui Pelan Pengurusan Impak Sosial adalah **supaya Kerajaan Negeri memberi perhatian kepada aspek-aspek berikut:**

- 1) Peningkatan sumber pendapatan (*livelihood improvement*);
- 2) Menjamin sumber pendapatan nelayan (*fishermen livelihood*); dan
- 3) Impak sosial lain (iaitu memberi perhatian kepada kesejahteraan psikologi, keselamatan marin, mengurangkan kacau ganggu semasa pembinaan dan pemuliharaan sosio-budaya setempat).

Selain itu, memandangkan laporan SIA yang dikemukakan ini dibuat berdasarkan pelan induk PSR, pihak pemaju dimohon perlu **mengemukakan semula laporan SIA apabila pelan susun atur terperinci secara berfasa dikemukakan semula** untuk mendapatkan nasihat MPFN di bawah subseksyen 22(2A) Akta 172. Ini bermakna setiap fasa pembangunan yang telah ada pelan terperinci perlu diangkat ke MPFN dan juga perlu mengemukakan semula Laporan SIA.

Walau bagaimanapun, Kelulusan Projek bergantung kepada kelulusan daripada Pihak Berkuasa Perancang Tempatan (PBPT). **Kerajaan Negeri dan PBPT perlu memberi perhatian terhadap nasihat** yang telah diberikan dalam Mesyuarat MPFN Ke-31 sebelum meluluskan projek ini.

NO. SOALAN: 9

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : TUAN MUSLIMIN BIN YAHAYA [SUNGAI BESAR]

TARIKH : 7 OKTOBER 2019 (ISNIN)

SOALAN NO. 9

minta **MENTERI AIR, TANAH DAN SUMBER ASLI** menyatakan apakah cadangan Kementerian untuk mengembalikan keyakinan rakyat bahawa pengurusan hutan di Semenanjung Malaysia diurus secara mampan, bersih dan berintegriti.

JAWAPAN

Tuan Yang di-Pertua,

Kementerian Air, Tanah dan Sumber Asli (KATS) melalui Jabatan Perhutanan Semenanjung Malaysia (JPSM) komited dalam memastikan pengurusan hutan di Semenanjung Malaysia diuruskan secara mampan selaras dengan komitmen negara untuk mengekalkan sekurang-kurangnya 50 peratus daripada keluasan tanah negara dilitupi dengan kawasan berhutan.

Untuk makluman Yang Dipertua, tanah dan hutan adalah di bawah bidang kuasa Kerajaan Negeri mengikut Perkara 74(2) Jadual Ke-Sembilan Perlembagaan Persekutuan, bidang kuasa KATS melalui JPSM adalah sebagai pembuat dasar dan memberikan khidmat nasihat teknikal mengenai pengurusan, pembangunan, penguatkuasaan, penyelidikan serta latihan dalam sektor perhutanan.

Untuk makluman Yang Dipertua, bagi jangka masa pendek, langkah-langkah berikut telah dilaksanakan:-

- (i) KATS sentiasa bekerjasama dengan Kementerian-kementerian lain seperti KDN dan MESTECC, Kerajaan-kerajaan Negeri dan orang awam dalam aktiviti membanteras penjenayah alam sekitar. KATS melalui JPSM juga telah menggunakan teknologi terkini seperti penggunaan imej satelit dan *drone* dalam aktiviti penguatkuasaan hutan;

- (ii) KATS dan JPSM kini telah mempunyai Unit Integriti sendiri yang diketuai oleh pegawai daripada SPRM bagi memantau aduan, salah guna kuasa dan rasuah dalam sektor perhutanan. KATS juga sentiasa menjalankan hubungan dan kerjasama yang rapat dengan pihak SPRM bagi meningkatkan imej dan integriti KATS serta agensi-agensi lain di bawah KATS; dan
- (iii) Sebanyak lapan (8) negeri di Semenanjung Malaysia yang terlibat dengan aktiviti pengeluaran hasil kayu balak telah diwajibkan untuk memperolehi *Malaysian Criteria and Indicators for Forest Management Certification* (MC&I). Sijil ini adalah sebagai kayu pengukur pelaksanaan prinsip Pengurusan Hutan Secara Berkekalan yang diiktiraf di peringkat antarabangsa bagi mencerminkan perlaksanaan pengurusan hutan mampan yang diamalkan di negara kita.

Manakala, untuk jangka masa panjang, KATS melalui JPSM sedang melaksanakan pindaan ke atas Akta Perhutanan Negara 1984 (Pindaan 1993) [Akta 313] sedia ada. Tujuan pindaan Akta 313 adalah untuk :-

- (i) memperketatkan proses pewartaan keluar Hutan Simpanan Kekal (HSK) melalui kaedah berikut:

Pertama : memperuntukkan keperluan untuk diadakan penyiasatan awam oleh Pihak Berkuasa Negeri bagi keputusan mewarta keluar Hutan Simpanan Kekal dalam Akta 313 sebagai punca kuasa perundangan di mana Pihak Berkuasa Negeri boleh membuat

Kaedah Penyiasatan Awam bagi menjalankan tujuan dan maksud tersebut di mana peruntukan ini melibatkan pindaan bagi Seksyen 11, Akta 313.

Kedua: penyiaran warta keluar dan warta kawasan ganti hendaklah dibuat serentak di mana peruntukan ini melibatkan pindaan bagi Seksyen 12, Akta 313.

Ketiga: kawasan Hutan Simpanan Kekal yang diwarta keluar hendaklah diganti dan mempunyai keluasan dan nilai setara serta mengenakan kos memulihkan kawasan ganti di mana peruntukan ini melibatkan pindaan bagi Seksyen 13, Akta 313 .

- (ii) memantapkan litupan warta pegawai penguatkuasaan untuk melaksanakan penguatkuasaan Akta 313 di negeri-negeri;
- (iii) meningkatkan kadar denda,hukuman dan penalti; dan
- (iv) mengatasi isu kecaburan dan kuasa yang tidak jelas dalam pelaksanaan Akta 313.

Kementerian Kewangan (MOF) telah memperuntukkan sejumlah RM 60 juta sebagai insentif dan untuk meningkatkan kawasan perlindungan. Agihan ini telah dibincangkan dan diluluskan di peringkat mesyuarat Majlis Kewangan Negara yang bersidang pada 27 Mei 2019.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS DEWAN RAKYAT

PERTANYAAN : LISAN

DARIPADA : DATIN MASTURA BINTI MOHD YAZID
[KUALA KANGSAR]

TARIKH : 7 OKTOBER 2019 (ISNIN)

SOALAN

Datin Mastura binti Mohd Yazid [Kuala Kangsar] minta **MENTERI INDUSTRI UTAMA** menyatakan apakah signifikan tindakan Kementerian untuk memfailkan aduan kepada Pertubuhan Perdagangan Dunia (WTO) ekoran daripada pendirian Kesatuan Eropah (EU) untuk mengharamkan penggunaan bahan api berdasarkan sawit di benua itu.

JAWAPAN

Tuan Yang Di-Pertua,

Untuk makluman Ahli-Ahli Yang Berhormat, *Delegated Regulation* iaitu peraturan pelengkap di bawah *European Union Renewable Energy Directive II* (EU RED II) telah diterima dan diperaku serta diterbitkan dalam jurnal rasmi oleh pihak EU pada 21 Mei 2019. Akta atau peraturan ini adalah satu akta yang menerangkan antara lain mengenai kriteria atau metodologi bagi menentukan sama ada sumber dalam pengeluaran biobahan api menyebabkan kadar *indirect land use change* (ILUC) yang tinggi atau rendah dan kesannya kepada pelepasan gas rumah hijau.

Dalam hal ini, berdasarkan kepada *Delegated Regulation* tersebut, minyak sawit telah dikategorikan sebagai mempunyai kadar ILUC yang tinggi. Oleh itu, bermula pada Julai 2021, jumlah eksport minyak sawit negara akan dihadkan pada tahap dan nilai penggunaan bagi tahun 2019. Dan seterusnya akan dikeluarkan sepenuhnya daripada sumber biobahan api di EU bermula pada tahun 2030 sekiranya masih dikategorikan sebagai mempunyai kadar ILUC yang tinggi selepas

semakan semula pada tahun 2021.

Berdasarkan analisis, *Delegated Regulation* di bawah EU RED II dilihat mempunyai kekurangan dari segi ketelusan, kredibiliti saintifik dan terdapat banyak andaian yang dibuat memberikan gambaran yang tidak tepat terhadap amalan kemampanan yang dipraktikkan dalam industri sawit negara. Selain itu, ia juga dilihat berat sebelah apabila hanya minyak sawit dikategorikan sebagai mempunyai kadar risiko ILUC yang tinggi dalam kalangan minyak yang lain bagi sumber kepada bio bahan api. Tindakan ini telah mewujudkan sekatan yang tidak sewajarnya ke atas usaha kemampanan yang telah dan sedang dilaksanakan oleh Malaysia serta seterusnya menyekat amalan perdagangan bebas.

Mengambil kira kepentingan industri sawit kepada negara termasuk pembangunan sosio-ekonomi lebih 3 juta rakyat Malaysia yang terlibat dengan industri sawit, Kerajaan berpandangan adalah wajar untuk Malaysia mengambil tindakan yang lebih tegas terhadap EU yang dilihat mendiskriminasi negara pengeluar minyak sawit.

Berdasarkan kepada semakan dan penilaian awal, polisi yang dinyatakan dalam *Delegated Regulation* di bawah EU RED II tersebut didapati telah melanggar prinsip-prinsip Pertubuhan Perdagangan Dunia (WTO) di bawah *General Agreement on Tariff and Trade (GATT)* 1994 dan *Agreement on Technical Barriers to Trade (TBT)*. Dalam hal ini, Malaysia dilihat mempunyai asas untuk mencabar EU melalui badan penyelesaian pertikaian (*Dispute Settlement Body*) di bawah WTO.

Dalam hal ini, Kementerian kini sedang bekerjasama dengan Jabatan Peguam Negara, Kementerian Perdagangan Antarabangsa dan Industri dan Kementerian Luar Negeri untuk meneliti perkara tersebut dan seterusnya menyediakan kertas perundangan sewajarnya. Kementerian sememangnya sudah bersedia dan mempunyai beberapa strategi lain serta memastikan langkah di atas terlaksana dengan sewajarnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SRI RICHARD RIOT ANAK
JAEM [SERIAN]**

TARIKH : 07 OKTOBER 2019 (ISNIN)

SOALAN

Minta **MENTERI SUMBER MANUSIA** menyatakan kadar pengangguran terkini diseluruh negara amnya dan di Sarawak khasnya dan apakah usaha Kementerian untuk mengurangkan kadar ini.

JAWAPAN

Tuan Yang di Pertua,

1. Berdasarkan kepada Survei Tenaga Buruh (STB) 2018, kadar pengangguran di Malaysia ialah 3.3 peratus. Manakala kadar pengangguran di Sarawak ialah 3.2 peratus.
2. Sebagai usaha bagi mengatasi kadar pengangguran, Kerajaan telah mengambil langkah-langkah berikut :
 - (i) Menyediakan perkhidmatan pekerjaan *JobsMalaysia* yang memberi kemudahan kepada pencari kerja untuk mendapatkan kerja yang bersesuaian melalui pendekatan pemandanan kerja. Bagi memenuhi keperluan semasa dan menambahbaik kecekapan pasaran buruh, Portal *JobsMalaysia* telah dirombak serta di naik taraf dan dikenali sebagai Portal JM2.0 yang telah dilancarkan pada September 2018;
 - (ii) Menganjurkan Program Penempatan Pekerjaan yang merangkumi Karnival Kerjaya, penempatan melalui *Client Account*, Temuduga Terbuka, Program Kerjasama Antara Agensi, *Holiday Placement For Students* (HOPS), Penempatan Dengan Kerjasama APS, Program Penempatan Golongan Khas serta Program Penyesuaian Kerjaya (2PK). Program-program ini telah diadakan dari semasa ke semasa bagi menemukan pencari kerja dengan majikan yang sepadan. Bagi tempoh Januari-Jun 2019, seramai 22,563 orang pencari kerja telah berjaya mendapat penempatan;
 - (iii) Mewujudkan pusat sehenti menggabungkan agensi seperti *JobsMalaysia*, Pertubuhan Keselamatan Sosial (PERKESO), Pembangunan Sumber Manusia Berhad (PSMB) dan Unit

SOALAN NO : 11

Peneraju Agenda Bumiputera (TERAJU) di UTC bagi menyediakan khidmat nasihat profesional untuk mendapatkan pekerjaan dan latihan;

- (iv) Melaksanakan program *Graduates Enhancement Programme For Employability* (GENERATE 2.0) bertujuan membantu golongan muda di kalangan graduan menganggur untuk mengikuti latihan dalam bidang berimpak tinggi bersesuaian dengan keperluan industri dan seterusnya diberikan jaminan penempatan pekerjaan di syarikat yang berdaftar dengan Pembangunan Sumber Manusia Berhad (PSMB). Semenjak diperkenalkan pada tahun 2016 sehingga tahun 2018, seramai 4,030 graduan telah dilatih dengan bantuan kewangan diluluskan berjumlah RM76.95 juta. Daripada jumlah tersebut, seramai 2,991 pelatih telah berjaya mendapat pekerjaan di mana gaji permulaan bagi pemegang diploma ialah minimum RM 2,000 sebulan manakala bagi pemegang ijazah RM 3,000 sebulan;
- (v) Mengukuhkan dan memperkasakan Program Sistem Latihan *Dual Nasional* (SLDN) melalui pelbagai program dan kerjasama bagi mengurangkan jurang ketidakpadanan kemahiran dengan keperluan industri. Program SLDN menawarkan latihan berasaskan industri dengan 70% latihan praktikal di syarikat dan 30% teori di institusi latihan;
- (vi) Melaksanakan program *Structured Internship Programme* (SIP) yang diterajui Talent Corp dengan kerjasama Kementerian Pendidikan Malaysia (KPM). Di bawah SIP, graduan akan mendapat pendedahan awal kepada dunia pekerjaan sebelum menamatkan pengajian supaya mereka lebih berdaya saing dan memiliki kemahiran yang memenuhi keperluan industri. Seramai 76,000 belia di kalangan pelajar universiti dan pelatih TVET telah menerima manfaat di bawah program ini;

SOALAN NO : 11

- (vii) Memperluas akses kepada warga negara untuk mendapat Latihan dan Pendidikan Teknikal dan Vokasional (TVET). Sehingga kini, terdapat 567 buah Institusi Latihan Kemahiran Awam (ILKA) yang telah ditubuhkan di seluruh negara dengan pelbagai kursus kemahiran ditawarkan mengikut keperluan industri;
 - (viii) Melaksanakan program *upskilling* dan *reskilling* kepada golongan pelajar kemahiran dan pekerja bagi mempertingkatkan kemajuan kendiri dalam menyesuaikan diri dengan perubahan keperluan kerja masa hadapan (*future jobs*) serta persekitaran yang semakin kompetitif dan dinamik; dan
 - (ix) Menggalakkan sektor-sektor berintensif buruh beralih kepada penggunaan mekanisasi dan automasi bagi mengurangkan kebergantungan ke atas pekerja asing
3. Kesimpulannya, Kerajaan dari semasa ke semasa akan menambah baik langkah-langkah sedia ada dan akan mewujudkan lebih banyak program atau mekanisme bagi membantu rakyat mendapatkan pekerjaan dan mengatasi kadar pengangguran negara.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS (2019)**

PERTANYAAN : LISAN

**DARIPADA : YB DATO' DR. MOHD KHAIRUDDIN BIN AMAN
RAZALI [KUALA NERUS]**

TARIKH : 07 OKTOBER 2019 (ISNIN)

SOALAN

Minta **PERDANA MENTERI** menyatakan perkembangan rancangan bagi menyeragamkan undang-undang Syariah di seluruh negara.

**JAWAPAN : (YB DATUK SERI DR. MUJAHID BIN YUSOF,
MENTERI DI JABATAN PERDANA MENTERI)**

Tuan Yang di-Pertua,

1. Untuk makluman Ahli Yang Berhormat, Kerajaan sentiasa komited untuk menggubal model draf undang-undang syariah bagi tujuan penyelarasan dan penyeragaman undang-undang negeri-negeri di seluruh Malaysia.
2. Antaranya, dengan kejayaan untuk mewujudkan Akta Profesional Guaman Syarie (Wilayah-Wilayah Persekutuan) 2019 yang telah diluluskan oleh Parlimen pada sesi mesyuarat yang lepas. Akta ini adalah undang-undang pertama yang digubal di Malaysia untuk mengangkat kedudukan peguam syarie di Malaysia. Akta ini diharap menjadi model draf undang-undang kepada negeri-negeri untuk diadaptasi dalam menggubal undang-undang berkaitan profesion guaman Syarie di negeri masing-masing.

NO. SOALAN : 12

3. Kerajaan sedang dalam proses untuk menyeragamkan undang-undang kesalahan jenayah syariah negeri-negeri di seluruh Malaysia. Untuk ini, kajian telah dijalankan di mana selain daripada penyeragaman dari segi jenis kesalahan, jenis hukuman dan kadar hukuman, terdapat juga penambahbaikan lain yang akan dibuat, antaranya dengan memasukkan atau memperkemaskan elemen-elemen kesalahan bagi kesalahan-kesalahan tertentu dan mengadakan peruntukan untuk memberi kuasa budi bicara kepada mahkamah syariah untuk membuat perintah-perintah yang bersifat pemulihan (*rehabilitative*).
4. Cadangan penyeragaman undang-undang kesalahan jenayah syariah ini telah dibentangkan dan dipersetujui oleh Majlis Kebangsaan Hal Ehwal Ugama Islam (MKI) pada 13 Jun 2019. Ia juga telah dibentangkan kepada negeri-negeri di bawah naungan DYMM SPB Yang di-Pertuan Agong iaitu, Wilayah-Wilayah Persekutuan, Sabah, Sarawak, Pulau Pinang, Melaka dan Pahang semasa sesi Majlis Munaqasyah Pengurusan Hal Ehwal Islam Negeri-Negeri di bawah naungan SBP Yang di-Pertuan Agong di Istana Negara pada 20 Jun 2019.
5. Cadangan draf model undang-undang kesalahan jenayah syariah yang digubal hasil daripada kajian yang dijalankan telah dibentangkan kepada negeri-negeri seluruh Malaysia untuk mendapatkan maklumbalas dan pandangan dalam Majlis Dialog Undang-Undang yang diadakan pada 4, 5, 11 dan 12 September 2019.
6. Kerajaan juga melalui Jawatankuasa Kajian Penambahbaikan Undang-Undang telah menjalankan kajian untuk menambah baik empat (4) undang-undang syariah utama yang telah diseragamkan oleh negeri-negeri di seluruh Malaysia iaitu:
 - a) undang-undang keluarga Islam;
 - b) undang-undang keterangan mahkamah syariah;
 - c) undang-undang tatacara mal mahkamah syariah; dan
 - d) undang-undang tatacara jenayah syariah.

7. Hasil kajian ini akan dibentangkan dan dimuktamadkan oleh Jawatankuasa Teknikal Undang-Undang Syarak dan Sivil. Selain itu, hasil kajian ini juga akan dibentangkan kepada negeri-negeri seluruh Malaysia untuk mendapatkan maklum balas dan pandangan melalui forum-forum seperti Majlis Dialog Undang-Undang dan Persidangan Penyelarasaran Undang-Undang Syarak dan Sivil. Kesemua maklum balas dan pandangan yang diberikan ini akan diperhalusi dan diteliti dalam menghasilkan draf model undang-undang yang terbaik sebelum dibentangkan dalam mesyuarat Persidangan Ketua-Ketua Jabatan (PKJ), Majlis Kebangsaan Hal Ehwal Ugama Islam (MKI) dan Majlis Raja-Raja.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KE-EMPAT BELAS**

PERTANYAAN : LISAN

DARIPADA : YB TUAN CHA KEE CHIN (RASAH)

TARIKH : 07 OKTOBER 2019 (ISNIN)

SOALAN

Minta **MENTERI PENGANGKUTAN** menyatakan apakah impak ekonomi kepada Negeri Sembilan apabila jajaran baru projek Laluan Rel Pantai Timur (ECRL) akan memasuki Negeri Sembilan dan kawasan di Negeri Sembilan yang akan dilalui oleh jajaran baru ini.

JAWAPAN

Yang di-Pertua,

1. Untuk makluman Yang Berhormat, jajaran baru Projek ECRL telah diperkenalkan setelah perlaksanaannya disambung semula oleh Kerajaan pada 12 April 2019 berikutan kejayaan merunding semula kos pembinaan projek dengan pihak Kerajaan Republik Rakyat China yang berhasil menurunkan kos sebanyak RM21.5 bilion.

2. Jajaran baru ini melibatkan Negeri Sembilan dan Wilayah Persekutuan Putrajaya yang dahulunya tidak termasuk di dalam jajaran asal ECRL. Penglibatan Negeri Sembilan di dalam jajaran ini termasuk pembinaan 2 buah stesen ECRL yang bakal memberi perkhidmatan penumpang dan kargo. Lokasi kedua-dua stesen dan jajaran ECRL di Negeri Sembilan akan dipamerkan kepada umum semasa Pemeriksaan Awam yang bakal dijalankan selama 3 bulan.

3. Kewujudan stesen penumpang ECRL di Negeri Sembilan bakal memberi kemudahan pengangkutan awam yang moden, efisyen dan selamat yang menghubungkan negeri ini dengan negeri-negeri di Pantai Timur Malaysia. Perkhidmatan penumpang ECRL juga akan dihubungkan dengan hub pengangkutan di Putrajaya Sentral yang mempunyai stesen KLIA Express Rail Link (ERL) yang sedia ada serta stesen terminal MRT2 yang bakal siap pada tahun 2022.
4. Dengan adanya kemudahan baru ini, Kerajaan menjangkakan peningkatan pergerakan penumpang di antara Negeri Sembilan, Pantai Timur dan hubungan dengan KLIA. Kemudahan pergerakan penumpang akan memberi impak positif yang besar kepada sektor perniagaan, perumahan, industri dan terutamanya sektor pelancongan.
5. Projek ECRL juga akan menyediakan perkhidmatan kargo dan ini akan meningkatkan daya saing projek-projek pembangunan bersepadu di Negeri Sembilan seperti Malaysia Vision Valley 2.0 dan taman-taman perindustrian sedia ada di Negeri Sembilan. Perkhidmatan kargo ECRL juga akan berhubung secara langsung dengan Pelabuhan Klang dan Pelabuhan Kuantan dan ini memberikan lebih banyak pilihan kepada pemain industri di Negeri Sembilan yang berorientasikan eksport.
6. Hubungan di antara 2 pelabuhan ini juga dijangka membuka peluang untuk pembangunan hab-hab industri tambah nilai di sepanjang jajaran di antara Kuantan dan Lembah Klang. Kedudukan Negeri Sembilan dari segi geografi dan demografi adalah sangat sesuai bagi hab-hab industri baru untuk dibangunkan dan memanfaatkan perkhidmatan kargo ECRL.
7. Selain daripada itu, kehadiran projek mega seperti ECRL dapat menjadi pendorong kepada pembangunan pelancongan di Negeri Sembilan dan memberi sebab kukuh untuk kerajaan negeri merancang pembangunan biodiversiti di persekitarannya yang dikelilingi oleh flora dan fauna. Situasi ini menawarkan peluang untuk mewujudkan pelbagai jenis pembangunan berdasarkan pelancongan seperti pembinaan hotel, inap desa dan restoran. Projek ECRL akan memberi akses lebih mudah kepada pelancong sama ada dari dalam atau luar negara untuk mengunjungi Negeri Sembilan.

ia pastinya akan merancakkan sektor pelancongan negeri selari dengan sasaran kerajaan negeri untuk meningkatkan prestasi sektor pelancongan yang turut menyasarkan kehadiran lebih ramai pelancong.

8. Pelaksanaan projek ECRL dilihat mampu memberi manfaat secara langsung kepada rakyat terutamanya komuniti yang tinggal berdekatan dengan jajaran projek termasuklah para usahawan industri kecil dan sederhana serta kontraktor-kontraktor tempatan. Dari aspek sosio-ekonomi, projek nasional ini berkeupayaan membuka banyak peluang pekerjaan secara langsung dan tidak langsung kepada penduduk setempat. Hasil pendapatan para usahawan perniagaan industri kecil dan sederhana dalam sektor pemakanan, peruncitan dan pembuatan di kawasan yang terlibat juga dijangka akan melonjak naik. Begitu juga dengan produktiviti dalam sektor pembinaan, perhotelan, perdagangan dan industri logistik yang bakal menjana hasil pendapatan yang positif dan memberangsangkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : DATUK ALEXANDER NANTA LINGGI [KAPIT]

TARIKH : 7 OKTOBER 2019 (ISNIN)

SOALAN

Minta **MENTERI HAL EHWAL EKONOMI** menyatakan adakah Petronas sudah atau belum mula membayar 5% cukai jualan yang dikenakan ke atas jualan produk petroleum yang dieksport ke luar negara kepada Sarawak. Ini, seperti mana yang diminta oleh Kerajaan Sarawak. Jelaskan, kalau sudah, berapa dalam Ringgit Malaysia, dan kalau belum, mengapa.

JAWAPAN

Tuan Yang di-Pertua,

1. Sebagaimana Ahli Yang Berhormat sedia maklum, isu berkaitan minyak dan gas adalah kompleks dan melibatkan banyak pihak berkepentingan. Mesyuarat Jawatankuasa Khas Kabinet (Pemandu) bagi Menyemak Pelaksanaan Perjanjian Malaysia 1963 (MA63) yang dipengerusikan oleh YAB Perdana Menteri pada 17 Disember 2018 memutuskan supaya ianya dibincangkan dalam satu forum berasingan. Dalam hal ini, dua Forum Berasingan (*Separate Forum*) telah dibentuk yang dipengerusikan secara bersama oleh YB Menteri Hal Ehwal Ekonomi dan YAB Ketua Menteri Sarawak (bagi isu berkaitan Sarawak) dan YAB Ketua Menteri Sabah (bagi isu berkaitan Sabah).

2. Skop forum berasingan ini merangkumi tiga (3) perkara iaitu:-
 - (i) Bayaran tunai atau Royalti;
 - (ii) Perbincangan komersial / *Business-to-Business* (B2B); dan
 - (iii) Cukai Jualan Produk Petroleum.
3. Mesyuarat Pertama Forum Berasingan untuk negeri Sarawak yang dipengerusikan secara bersama oleh YB Menteri Hal Ehwal Ekonomi dan YAB Ketua Menteri Sarawak telah diadakan pada 16 Mei 2019. Mesyuarat antara lain mencadangkan supaya PETRONAS dan Petroleum Sarawak Berhad (PETROS) mengemukakan satu kertas cadangan berhubung pendekatan terbaik sebagai model penyelesaian komersial.
4. Walau bagaimanapun, Mesyuarat Jawatankuasa Khas Kabinet (Pemandu) bagi Menyemak Pelaksanaan Perjanjian Malaysia 1963 (MA63) yang dipengerusikan oleh YAB Perdana Menteri pada 23 Julai 2019 bersetuju bahawa isu berkaitan petroleum akan dibincangkan dan diputuskan secara bersama antara YAB Perdana Menteri dan kedua-dua Ketua Menteri.
5. Keputusan daripada perbincangan antara ketiga-tiga pemimpin ini akan menjadi asas untuk meneruskan perbincangan termasuk mengenai pelaksanaan Cukai Jualan terhadap produk petroleum yang dieksport keluar dari negeri Sarawak. Memandangkan perkara ini sedang dibincangkan, tiada sebarang pembayaran dibuat oleh PETRONAS kepada Kerajaan Negeri Sarawak.

Sekian, terima kasih.

NO. SOALAN : 15

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : YB TUAN CHAN MING KAI [ALOR SETAR]

TARIKH : 7 OKTOBER 2019 (ISNIN)

SOALAN

Minta **PERDANA MENTERI** menyatakan negeri yang mengamalkan kutipan zakat berkonsep taawun dan dibenarkan pembayar zakat mengagihkan sebahagian bayaran zakat tersebut terus kepada asnaf. Berapa jumlah zakat sedemikian yang telah mendapat rebat cukai pendapatan LHDN.

**JAWAPAN: (YB DATUK SERI DR. MUJAHID BIN YUSOF,
MENTERI DI JABATAN PERDANA MENTERI)**

Yang Dipertua,

Menurut Butiran II, Jadual Kesembilan Perlembagaan Persekutuan, urusan berkaitan zakat adalah termasuk di bawah bidangkuasa pihak berkuasa kerajaan negeri melalui Majlis Agama Islam Negeri (MAIN) dengan Duli Yang Maha Mulia Sultan atau Raja bertindak selaku Ketua Agama Islam Negeri. Manakala bagi Wilayah Persekutuan, Sabah, Sarawak dan Pulau Pinang maka Seri Paduka Baginda Yang Di-Pertuan Agong adalah bertindak selaku Ketua Agama Islam.

Untuk makluman Yang Berhormat, Zakat itu sendiri bersifat taawun kerana taawun bermaksud bantu-membantu. Secara kesimpulannya, semua negeri di Malaysia mengamalkan konsep taawun dalam berzakat, iaitu yang berharta membantu yang kurang berkemampuan melalui amalan berzakat.

Jumlah rebat cukai ke atas wakalah zakat tidak dapat ditentukan jumlahnya oleh pihak LHDN kerana rebat cukai pendapatan adalah berdasarkan bukti pembayaran zakat kepada Majlis Agama Islam atau Agensi Mengurus Zakat yang direkodkan dan perkara ini adalah di luar bidang kuasa Kerajaan Persekutuan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KE-EMPAT BELAS**

PERTANYAAN : LISAN

**DARIPADA : Y.B. DATO' HAJI JALALUDDIN BIN HAJI
ALIAS [JELEBU]**

TARIKH : 7 OKTOBER 2019 (ISNIN)

SOALAN

Minta **MENTERI PENGANGKUTAN** menyatakan apakah status terkini penyiasatan terhadap kegagalan Sistem Pengurusan Keseluruhan Lapangan Terbang (TAMS) di Lapangan Terbang Antarabangsa Kuala Lumpur (KLIA) pada bulan Ogos yang lalu, adakah benar terdapat sebarang unsur khianat atau sabotaj.

JAWAPAN

Yang di-Pertua,

1. Untuk makluman Yang Berhormat, isu mengenai gangguan sistem rangkaian di KLIA yang bermula pada 21 Ogos 2019 lalu telah distabilkan pada 24 Ogos dan ianya masih dipantau oleh syarikat pengendali KLIA iaitu Malaysia Airports Holdings Berhad (MAHB). Kerajaan juga telah mengarahkan MAHB untuk mempertingkatkan keselamatan sistem rangkaian di KLIA dan juga mengarahkan pihak Berkusa Penerbangan Awam Malaysia (CAAM) untuk menyelaras dan memantau usaha bagi mempertingkatkan keselamatan sistem tersebut.
2. Untuk makluman Ahli Yang Berhormat, penyiasatan terhadap sistem rangkaian di KLIA ini termasuklah dakwaan terdapatnya kemungkinan unsur khianat atau sabotaj masih dalam proses siasatan pihak Polis DiRaja Malaysia (PDRM).
3. Kerajaan melalui Kementerian Pengangkutan telah menubuhkan suatu Jawatankuasa Peringkat Kementerian yang dianggotai oleh pakar-pakar dari Suruhanjaya Penerbangan Malaysia (MAVCOM), CAAM dan Agensi Keselamatan Siber Negara (NACSA) seperti yang yang telah diumumkan pada 26 Ogos 2019 yang lalu. Jawatankuasa tersebut diberi masa 30 hari untuk melaksanakan siasatan secara terperinci. Laporan penuh lengkap hasil siasatan tersebut sedang dimuktamadkan dan ianya akan dibentangkan kepada Jemaah Menteri pada Oktober 2019.
4. Selain menyiasat punca sebenar permasalahan yang berlaku, PDRM dan Jawatankuasa Peringkat Kementerian juga akan mengenalpasti implikasi serta kesan terhadap perkhidmatan di lapangan terbang merangkumi Total Airports Management System (TAMS) serta beberapa sistem yang berkaitan serta mencadangkan langkah-langkah penambahbaikan bagi mengelakkan insiden yang sama untuk berulang pada masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB DR. NIK MUHAMMAD ZAWAWI BIN
HAJI SALLEH [PASIR PUTEH]**

TARIKH : 07 OKTOBER 2019 (ISNIN)

SOALAN

Minta **MENTERI SUMBER MANUSIA** menyatakan apakah pihak Kementerian mempunyai perancangan untuk menetapkan piawaian tawaran gaji pekerja swasta mengikut taraf akademik pekerja.

JAWAPAN

Tuan Yang di-Pertua,

1. Penetapan gaji yang dibuat oleh Kerajaan adalah Gaji Minima di bawah Majlis Perundingan Gaji Negara (MPGN), Kementerian Sumber Manusia. Mengikut penetapan tersebut, setiap pekerja di Malaysia (pekerja tempatan dan pekerja asing) perlulah di bayar gaji minima (upah pokok) sebanyak RM1,100.00 Arahan ini adalah terpakai ke atas setiap pekerja di Semenanjung Malaysia, Sabah dan Sarawak.

2. Bagi makluman Dewan Yang Mulia ini, amalan / praktis tawaran gaji yang lazimnya di buat oleh majikan swasta adalah berdasarkan kepada mekanisme pasaran.

Tuan Yang di-Pertua,

3. Dalam usaha untuk memastikan taraf pembayaran gaji pekerja di Malaysia adalah setimpal dengan produktiviti yang dihasilkan, Kementerian Sumber Manusia melalui Jabatan Perhubungan Perusahaan Malaysia telah mengambil strategi dengan menggalakkan majikan melaksanakan Sistem Upah Yang Dikaitkan Dengan Produktiviti (PLWS). PLWS mewujudkan hubungan saling melengkapi di antara upah dan produktiviti pekerja. Melalui pelaksanaan sistem ini, ia membolehkan pekerja-pekerja mendapat upah yang adil melalui hasil daripada peningkatan produktiviti dan prestasi mereka. PLWS diimplementasikan oleh kerajaan untuk melahirkan budaya kerja berdasarkan prestasi dan produktiviti.
4. Sehingga September 2019, bilangan majikan yang melaksanakan PLWS adalah sebanyak 86,917 majikan dengan jumlah pekerja yang menikmati faedah PLWS adalah seramai 4,530,102 orang pekerja.
5. Selain daripada pelaksanaan PLWS, pemberian ganjaran atau insentif berdasarkan prestasi/produktiviti juga boleh dinyatakan secara jelas dalam Perjanjian Kolektif. Perjanjian Kolektif merupakan satu dokumen perjanjian yang ditandatangani di antara majikan dan kesatuan sekerja pekerja dan diperakukan (*cognizance*) oleh Mahkamah Perusahaan. Ia mengandungi terma-terma dan syarat-syarat perkhidmatan seperti bayaran bonus, kenaikan gaji dan insentif-insentif berdasarkan prestasi dan produktiviti.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN MOHD SHAHAR BIN ABDULLAH
[PAYA BESAR]**

TARIKH : 7 OKTOBER 2019

SOALAN NO. 18

Minta **MENTERI BELIA DAN SUKAN** menyatakan:-

- (a) status terkini penerimaan 13 Kerajaan Negeri terhadap pindaan Akta Pertubuhan Belia 2007 dan Pembangunan Belia (Pindaan 2019) yang menurunkan had umur belia kepada 30 tahun; dan
- (b) bilakah Kementerian akan menyalurkan semula dana pentadbiran kepada persatuan-persatuan belia seluruh negara.

JAWAPAN

Yang di-Pertua,

1. Seperti Ahli Yang Berhormat sedia maklum, selaras dengan cadangan pindaan had umur belia dalam Akta Pertubuhan Belia dan Pembangunan Belia (Pindaan) 2019 [Akta A1602] yang telah diluluskan pada 3 dan 24 Julai di Dewan Rakyat dan Dewan Negara, tarikh cadangan penguatkuasaan akta ini adalah pada 1 Januari 2022 dengan tempoh transisi kepimpinan pertubuhan belia sehingga 31 Disember 2021.
2. Dalam pada itu, KBS juga akan melaksanakan sesi libat urus bersama semua Pejabat Setiausaha Kerajaan Negeri (SUKN) dan kepimpinan negeri bagi menerangkan pelaksanaan pindaan ini dan memudah cara transisi kepimpinan pertubuhan belia di negeri.
3. Kementerian Belia dan Sukan (KBS) melalui agensi di bawahnya iaitu Jabatan Belia dan Sukan Negara (JBSN), Pejabat Pendaftar Pertubuhan Belia (ROY) dan Institut Pembangunan Kecemerlangan Kepimpinan (i-LEAD) telah mengambil langkah-langkah proaktif bagi memudah cara proses-proses transisi kepimpinan di peringkat pertubuhan belia melalui tiga (3) strategi iaitu:
 - a. menggerakkan penyediaan dan pelaksanaan Pelan Peralihan Kepimpinan (*Succession Plan*) Pertubuhan Belia yang berdaftar di bawah Akta Pertubuhan Belia dan Pembangunan Belia 2007 sejak tahun 2017 lagi. Bagi tempoh tahun 2017 sehingga 2019, adalah disasarkan sebanyak 50% bawah 30 tahun dan 50% atas 30 tahun. Pelan Peralihan Kepimpinan ini diteruskan bagi tempoh 2020 dan 2021 dengan menyasarkan sebanyak 70% bawah 30 tahun seterusnya mencapai 100% pada 31 Disember 2021;

SOALAN NO : 18

- b. melaksanakan Program Insentif Pembangunan Pemimpin Pelapis Pertubuhan menerusi program-program latihan untuk memperkasakan kepimpinan berumur 30 tahun ke bawah melalui Kursus Pengurusan Organisasi (KPO); dan
- c. meningkatkan "*Pool of Talent*" pemimpin pelapis pertubuhan melalui beberapa program seperti *Youth Power Club* (YPC), Federasi Kebangsaan Pekerja Belia (FKPB), Pemerkasaan Rakan Muda dan *Malaysia Future Leaders School* (MFLS).
4. Bagi memperkasa tadbir urus pertubuhan belia, ROY akan melaksanakan bengkel tadbir urus dan *road show* di setiap negeri bagi memberikan kefahaman berkenaan pindaan Akta 668 dan membantu pertubuhan belia dalam merangka pelan transisi kepimpinan serta menasihatkan pertubuhan belia untuk meminda perlembagaan supaya selari dengan pindaan Akta 668. Dalam pada itu, ROY juga akan menambah baik sistem e-ROY bagi memastikan pendaftaran dan urusan-urusan lain yang berkaitan dapat dilaksanakan dengan lebih cepat dan mudah.
5. Dalam perancangan gerak kerja tahun 2020, ROY akan meneruskan pelaksanaan program penarafan bintang (*Star Rating*) yang telah dilaksanakan sebelum ini (2018/2019) kepada pertubuhan belia yang berdaftar dengan pemberat diberikan kepada pertubuhan/persatuan belia yang telah bersedia dengan proses transisi kepimpinan iaitu dari segi umur kepimpinan dan keahlian serta pencapaian dalam pelaksanaan program.
6. KBS hanya akan menyalurkan bantuan pentadbiran kepada pertubuhan belia peringkat kebangsaan sahaja pada masa akan datang. Walau bagaimanapun, semua pertubuhan belia digalakkan untuk membuat permohonan bantuan kewangan bagi pelaksanaan program dan aktiviti berkaitan pembangunan belia dan pembangunan sukan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS (2019)**

PERTANYAAN : LISAN

**DARIPADA : YB PUAN RUSNAH BINTI ALUAI
[TANGGA BATU]**

TARIKH : 7 OKTOBER 2019 (ISNIN)

SOALAN

Minta **PERDANA MENTERI** menyatakan apakah Kerajaan mempunyai perancangan untuk mengecualikan pelajar-pelajar lepasan Institusi Tahfiz mempunyai Sijil Pelajaran Malaysia sebagai syarat untuk mendapatkan pekerjaan dalam jabatan-jabatan Kerajaan.

JAWAPAN : (YB DATUK SERI DR. MUJAHID BIN YUSOF, MENTERI DI JABATAN PERDANA MENTERI)

Tuan Yang di-Pertua,

1. Jabatan Perkhidmatan Awam (JPA) pada masa ini menentukan pengambilan calon ke dalam perkhidmatan awam memenuhi syarat lantikan dalam skim perkhidmatan yang berkuatkuasa mengikut peringkat kelayakan akademik calon seperti yang berikut:

Gred 11: PT3/PMR;
Gred 19: SPM
Gred 29 : STPM/Diploma
Gred 41: Ijazah Sarjana Muda

2. Bagi pelajar tahniz yang memiliki Diploma atau Ijazah Sarjana Muda boleh dilantik ke dalam perkhidmatan awam tanpa perlu memiliki Sijil Pelajaran Malaysia (SPM). Walau bagaimanapun, berdasarkan Pekeliling 1 tahun 2016, semua lantikan ke perkhidmatan awam perlu memenuhi syarat lulus atau kepujian Bahasa Melayu peringkat SPM (berdasarkan skim perkhidmatan tertentu). Justeru, syarat tersebut perlu dipatuhi dan bagi memenuhi syarat tersebut, calon boleh mengambil peperiksaan Bahasa Melayu sebagai mata pelajaran tunggal dalam peperiksaan SPM.

3. Dalam masa yang sama, Kerajaan juga sedang merancang inisiatif untuk membolehkan pelajar-pelajar tahniz di institusi tahniz swasta yang berdaftar menduduki peperiksaan SPM di sekolah-sekolah KPM terpilih. Di samping itu juga, di bawah inisiatif Dasar Pendidikan Tahniz Negara (DPTN) melalui model tahniz dengan kemahiran, JAKIM dan KPM serta beberapa agensi berkaitan telah membangunkan program tahniz TVET bagi menyediakan pelajar-pelajar ini dengan kemahiran tertentu sebagai tambah nilai untuk pasaran pekerjaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATO' SYED ABU HUSSIN BIN HAFIZ SYED
ABDUL FASAL [BUKIT GANTANG]**

TARIKH : 7 OKTOBER 2019

SOALAN

Minta **MENTERI BELIA DAN SUKAN** menyatakan dasar Kementerian bagi mewujudkan peluang pekerjaan secara khusus kepada kumpulan B40 atau anak muda yang berada di kawasan luar bandar seperti di Parlimen Bukit Gantang. Ini merujuk kepada dasar terbaru Kerajaan yang mewujudkan peluang pekerjaan menerusi perkhidmatan teksi motosikal (Gojek Malaysia) di kawasan bandar dan bagaimana pula di kawasan luar bandar.

JAWAPAN

Yang di-Pertua,

1. Seperti Ahli Yang Berhormat sedia maklum, Iltizam Khusus Untuk Anak Muda di dalam Manifesto Kerajaan telah menggariskan komitmen bagi memastikan adanya lebih banyak peluang pekerjaan dengan gaji yang selayaknya kepada anak muda. Ini bagi memastikan potensi anak-anak muda dijana sepenuhnya seperti yang termaktub dalam matlamat Dasar Belia Malaysia, sekali gus menangani kebimbangan utama yang memberi kesan terhadap anak muda pada hari ini iaitu isu pengangguran dan peluang pekerjaan khususnya kepada golongan B40 dan anak muda yang berada di luar bandar.

SOALAN NO : 20

2. Susulan itu, Jemaah Menteri dalam mesyuaratnya pada 21 Ogos 2019 telah bersetuju dengan cadangan membenarkan perkhidmatan teksi motosikal di Malaysia (*Ride-Hailing*). *Ride-Hailing* antara lain bertujuan untuk menyediakan lebih banyak peluang pekerjaan di samping dapat meningkatkan pendapatan dalam kalangan anak muda. Sehubungan itu, Kementerian Pengangkutan (MOT) telah memulakan beberapa gerak kerja seperti berikut:
- (a) melaksanakan Kajian Persepsi Pengguna Jalan Raya terhadap Kebolehlaksanaan Perkhidmatan Teksi Motosikal di Malaysia oleh Institusi Penyelidikan Keselamatan Jalan Raya Malaysia (MIROS). Laporan kajian ini akan dikemukakan kepada MOT untuk tindakan selanjutnya; dan
 - (b) mengadakan mesyuarat dengan pihak Kementerian/Agensi berkaitan bagi mendapatkan input/pandangan mengenai cadangan ini. Dalam mesyuarat ini juga dimaklumkan bahawa MOT sedang dalam penyediaan Memorandum Jemaah Menteri dan mengenal pasti pindaan-pindaan terhadap akta yang berkaitan.
3. Selain itu, KBS juga telah melaksanakan pelbagai jenis program di negeri Perak bagi memberikan pendedahan kepada para belia berkenaan dengan ilmu keusahawanan. Program-program ini dibangunkan antara lain bertujuan untuk membangunkan ciri-ciri keusahawanan dan memupuk pembudayaan keusahawanan kepada para belia untuk memilih bidang mereka. Antara program keusahawanan yang dilaksanakan adalah Pembangunan Usahawan Digital (*Young Heroes*), Y-Career Siri 1 dan Siri 2, Y-Bex dan Kursus *Young Agrotech*, kesemuanya melibatkan 161 peserta.
4. Bagi memastikan pembangunan belia yang berada dalam bidang keusahawanan, kementerian dengan bidang kuasa yang ada telah merancang satu program khas yang dinamakan “*Skills Training At Risk*

SOALAN NO : 20

@Youth” atau STAR@U : *My Future Youth Plus*. Program yang dilaksanakan ini bukan sahaja memberi ruang dan peluang kepada lebih ramai belia mendapat kemahiran, ianya juga meningkatkan peluang belia mencebur ke bidang keusahawanan.

5. Bagi tahun 2019, 70 program *Myfuture Youth Plus* dilaksanakan melibatkan 21 Institusi Latihan Kemahiran Belia dan Sukan (ILKBS). Seramai 727 belia yang berjaya dilatih menerusi program tersebut. Berdasarkan kajian impak yang dijalankan 9.2% telah menjadi usahawan hasil daripada program tersebut.

6. Kementerian juga turut menerapkan budaya keusahawanan dalam kalangan pelajar ILKBS. Beberapa program telah diadakan di peringkat ILKBS seperti:

- i. Penguatkuasaan silibus baharu Keusahawanan Digital pada sesi 1/2020 menambah baik silibus keusahawanan sedia ada, bertujuan melahirkan graduan berkemahiran bukan sahaja dalam bidang teknikal, malah berpotensi menjadi usahawan yang berdaya saing di era ekonomi digital masa kini; dan
- ii. Penubuhan projek inkubator program keusahawanan di ILKBS bagi melatih pelajar semester akhir mengaplikasikan kemahiran sebelum keluar membangunkan bisnes sendiri.

7. Di samping itu, bagi memastikan adanya lebih banyak peluang pekerjaan dengan gaji yang selayaknya kepada anak muda, Mesyuarat Jemaah Menteri pada 11 September 2019 telah bersetuju menuju Jawatankuasa Peluang Pekerjaan Anak Muda yang akan dipengerusikan oleh YAB Perdana Menteri. Jawatankuasa ini bertindak sebagai badan perunding, penyelaras dan penasihat kepada Kerajaan untuk meluaskan peluang pekerjaan anak muda daripada aspek dasar, perancangan serta pelaksanaan agenda pembangunan ekonomi anak muda.

SOALAN NO : 20

8. Jawatankuasa ini terdiri daripada pihak Kerajaan, syarikat berkaitan Kerajaan (GLC), perbankan, penyelidik, dan peneraju industri. Penglibatan pelbagai pihak ini akan dapat membantu Kerajaan ke arah mewujudkan 1 juta peluang pekerjaan kepada anak muda dalam tempoh 5 hingga 10 tahun seperti yang terkandung dalam Manifesto Kerajaan. Antara isu-isu yang akan dibincangkan oleh jawatankuasa ini meliputi pengangguran, tawaran gaji rendah, peluasan sektor pekerjaan dalam pelbagai bidang, kesepadan pendidikan/latihan mengikut keperluan industri dan lain-lain.
9. Pada umumnya, jawatankuasa ini akan mengadun satu pendekatan yang inovatif dengan menggalakkan kesinambungan dasar Kerajaan bersama keperluan industri dalam mempertingkatkan peluang pekerjaan yang berkualiti bagi generasi muda pada hari ini dan masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HALIMAH BINTI MOHAMED
SADIQUE [KOTA TINGGI]**

TARIKH : 7 OKTOBER 2019 [ISNIN]

SOALAN

Minta **MENTERI HAL EHWAL EKONOMI** menyatakan sejauh manakah keberkesanan pengurusan hutang peneroka FELDA telah berjaya dilaksanakan dan apakah kekangan dalam memastikan proses mengutip data yang dijalankan seperti cadangan dalam Kertas Putih.

JAWAPAN

Tuan Yang di-Pertua,

1. Untuk makluman Ahli Yang Berhormat, melalui Program Transformasi FELDA (PTF), FELDA telah mempergiatkan kempen dan sesi libat urus ke semua wilayah FELDA untuk menerangkan kepada peneroka mengenai kepentingan membayar hutang. Keberkesanan usaha ini dapat dilihat melalui prestasi kutipan hutang dalam tempoh Januari hingga Jun 2019 yang menunjukkan peningkatan sebanyak RM36.86 juta atau 32.53 peratus, iaitu daripada RM150.18 juta pada tahun 2019 berbanding RM113.32 juta untuk tempoh yang sama pada tahun 2018.
2. Walau bagaimanapun, FELDA masih lagi menghadapi beberapakekangan dalam proses mengutip data hutang peneroka dan untuk menyatukan pelbagai hutang peneroka dalam satu rumusan penyata hutang. Bagi mengatasi kekangan ini, FELDA sedang menambah baik e-Penyata dengan format baharu yang lebih terperinci bagi meningkatkan kecekapan penyampaian maklumat hutang kepada peneroka. Penyata berkenaan akan diedarkan secara bulanan kepada peneroka.
3. FELDA juga telah mewujudkan *Standard Operating Procedure (SOP)* baharu iaitu Prosedur Penyediaan Penyata Hutang Tanam Semula Peneroka berkuatkuasa mulai Julai 2019 dan sedang menambah baik sistem *Fix Loan Repayment Schedule (FLRS)* bagi memuktamadkan hutang tanam semula peneroka seterusnya membolehkan penghapusan faedah hutang kebun peneroka dapat dilaksanakan.
4. Selain itu, FELDA sedang menambah baik polisi kutipan hutang peneroka melalui kajian semula Dasar Pendapatan Minima Peneroka bertujuan mengimbangi keperluan FELDA mengutip hutang dan dalam masa yang sama tidak menjaskankan pendapatan peneroka.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : DATO' DR. NORAINI AHMAD
[PARIT SULONG]

TARIKH : 7 OKTOBER 2019 (ISNIN)

SOALAN : 22

Minta **PERDANA MENTERI** menyatakan kos dan hasil lawatan Perdana Menteri ke luar negara dan beberapa jumlah terkini pelaburan telah berjaya dibawa masuk ke dalam negara.

JAWAPAN : **YB DATUK LIEW VUI KEONG, MENTERI DI JABATAN PERDANA MENTERI**

Tuan Yang di-Pertua,

Perbelanjaan terperinci bagi keseluruhan lawatan rasmi ke luar negara yang dibuat oleh Perdana Menteri bagi tempoh mulai Jun 2018 sehingga September 2019 adalah berjumlah **RM20,964,289.24** (melibatkan 30 lawatan). Perbelanjaan ini merangkumi pegawai Kerajaan yang turut serta dalam setiap lawatan Perdana Menteri ke luar negara sepertimana yang telah diluluskan oleh Jemaah Menteri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB DATO' MOHD. NIZAR BIN HAJI
ZAKARIA [PARIT]**

TARIKH : 07 OKTOBER 2019 (ISNIN)

SOALAN

Minta **MENTERI SUMBER MANUSIA** menyatakan:-

- (a) berapa jumlah peluang pekerjaan yang telah diwujudkan oleh Kerajaan kepada golongan muda sehingga suku tahun ketiga 2019; dan
- (b) berapa sasaran realistik peluang pekerjaan baru yang akan diwujudkan kepada golongan muda oleh Kementerian menjelang tahun 2020.

JAWAPAN

Tuan Yang di-Pertua,

1. Berdasarkan statistik daripada Portal pekerjaan *JobsMalaysia* sehingga Ogos 2019, kekosongan pekerjaan yang didaftarkan oleh majikan-majikan bagi kategori siswazah adalah sebanyak 50,326 jawatan manakala sebanyak 642,979 kekosongan jawatan adalah untuk kategori bukan siswazah. Pengiklanan oleh lebih 20,000 majikan aktif yang menawarkan pelbagai jawatan di semua kategori pekerjaan sektor awam dan swasta.
2. Portal *JobsMalaysia* (JMC) di bawah kementerian ini merupakan portal rasmi pasaran pekerja untuk pencarian dan penawaran pekerjaan melalui sistem padanan kerja yang lebih mudah dan sistematik dengan memastikan setiap pencari kerja berpeluang mendapatkan pekerjaan dan majikan pula berpeluang untuk mendapatkan calon yang sesuai. Melalui proses padanan ini, pencari kerja akan menikmati kemudahan secara interaktif dan memaparkan pilihan jawatan yang ditawarkan oleh majikan secara sistem *web based*.
3. Pusat *JobsMalaysia* di seluruh negara menawarkan pelbagai informasi kekosongan pekerjaan dan perkhidmatan khidmat nasihat pekerjaan kepada pencari kerja dan majikan secara percuma dan kemudahan menjalankan temuduga terbuka. Pencari kerja pula berpeluang untuk menyertai karnival pekerjaan di seluruh negara termasuk program-program temuduga terbuka yang diadakan di semua *Urban Transformation Center (UTC)* dan JMC di seluruh negara sepanjang tahun.
4. Kementerian melalui Jabatan Tenaga Kerja (JTK) telah melaksanakan pelbagai program untuk membantu para pencari kerja yang terdiri pencari kerja merupakan kumpulan berpendidikan yang tamat dari alam persekolahan dan juga kumpulan yang mencari

SOALAN NO : 23

peluang kerjaya yang lebih baik mencari padanan pekerjaan yang sesuai memenuhi aspirasi kerjaya dan jangkaan pendapatan mereka. Tempoh pencarian pekerjaan bergantung kepada faktor, antaranya kepesatan pertumbuhan ekonomi, peningkatan pelaburan dalam dan luar negara di mana wujudnya peluang-peluang pekerjaan di pelbagai sektor ekonomi yang boleh dimanfaatkan oleh pencari kerja.

Tuan Yang di-Pertua,

5. Menurut Laporan Rancangan Malaysia Ke-11, kajian separuh penggal, unjuran pewujudan keseluruhan peluang pekerjaan bagi 5 sektor ekonomi utama negara pada tahun 2020 adalah dianggarkan sebanyak 1,510,600. Lazimnya unjuran pewujudan peluang pekerjaan tidak dijalankan secara spesifik dengan memfokuskan kepada suatu kelompok masyarakat tertentu sahaja seperti golongan orang muda tetapi sebaliknya akan melibatkan setiap golongan dalam masyarakat

6. Sektor perkhidmatan merupakan sektor yang mengalami unjuran pewujudan peluang pekerjaan terbesar iaitu kira-kira 1,156,100 atau 76.5% daripada jumlah keseluruhan tersebut. Sektor pembuatan pula merekodkan pewujudan peluang pekerjaan sebanyak 318,600 atau 21.0% pada tahun 2020. Seterusnya pewujudan peluang pekerjaan bagi sektor pembinaan pada 2020 dianggarkan sebanyak 40,100 atau 2.7% daripada jumlah keseluruhan unjuran peluang pekerjaan. Sektor perlombongan dan pengangkutan pula merekodkan unjuran pewujudan peluang pekerjaan yang terendah pada 2020 iaitu sebanyak 1,000 atau 0.1% sahaja.

7. Walau bagaimanapun, sektor pertanian, perhutanan, ternakan dan perikanan dijangka mengalami kemerosotan sebanyak 5,200 atau -0.3% dalam pewujudan peluang pekerjaan pada tahun 2020.

**PEMBERITAHUAN PERTANYAAN BAGI JAWAPAN LISAN
MESYUARAT KETIGA, PENGGAL KEDUA
PARLIMEN KEEMPAT BELAS DEWAN RAKYAT**

PERTANYAAN : LISAN

**DARIPADA : DATO' DR. SHAMSUL ANUAR BIN HAJI NASARAH
[LENGGONG]**

TARIKH : 7 OKTOBER 2019 (ISNIN)

SOALAN

DATO' DR. SHAMSUL ANUAR BIN HAJI NASARAH [LENGGONG]
minta **MENTERI INDUSTRI UTAMA** menyatakan :-

- (a) sejak kempen ‘Sayangi Sawitku’ dilaksanakan berapa jumlah peningkatan penggunaan minyak sawit di kalangan rakyat serta kenaikan eksport oleh negara luar dan sejauh mana ia berjaya meningkatkan harga minyak sawit mentah negara; dan
- (b) mengapakah harga getah masih lagi gagal distabilkan oleh Kerajaan sehingga mengakibatkan harga getah masih lagi rendah iaitu di paras RM2.07sen pada September yang lepas.

JAWAPAN

Tuan Yang di-Pertua,

Kempen Sayangi Sawitku diadakan sepanjang tahun 2019 dengan tujuan memberi kesedaran kepada rakyat Malaysia mengenai kebaikan dan khasiat minyak sawit dan juga cabaran yang dihadapi oleh komoditi sawit. Di samping itu, kempen ini juga bertujuan untuk menggalakkan rakyat Malaysia mempertahankan komoditi sawit dan menjadi jurucakap sawit melalui pendekatan '*From Malaysia, we speak to the world*'.

Jumlah eksport minyak sawit dan produk berasaskan sawit ke negara-negara luar telah meningkat sebanyak 11.3% iaitu daripada 12.4 juta tan bagi Januari – Jun 2018 kepada 13.8 juta tan bagi tempoh yang sama pada tahun ini. Hal

ini secara tidak langsung adalah pencapaian kempen Sayangi Sawitku yang telah berjaya meningkatkan penerimaan dan kesedaran terhadap minyak sawit.

Selain itu, pelaksanaan kempen ini menunjukkan impak positif dengan lebih ramai rakyat Malaysia daripada pelbagai lapisan masyarakat telah tampil untuk menyuarakan sokongan terhadap industri sawit negara termasuk pemimpin utama negara, tokoh korporat, personaliti media, ketua masyarakat, pelajar dan lain-lain. Manakala industri lain seperti penerbangan, pelancongan dan hiburan juga turut bekerjasama menjayakan kempen ini melalui penajaan dan publisiti.

Seperti komoditi negara yang lain, getah asli adalah berorientasikan eksport dan harganya ditentukan oleh permintaan dan penawaran di pasaran antarabangsa serta tidak dikawal oleh Kerajaan. Di samping itu, terdapat faktor-faktor ekonomi asas dan bukan asas lain yang turut mempengaruhi harga getah asli seperti paras stok getah antarabangsa, prestasi niaga hadapan, harga minyak mentah, kadar pertukaran matawang asing dan pertumbuhan ekonomi negara-negara pengeluar dan pengimport utama getah dunia. Oleh kerana syer pengeluaran Malaysia adalah hanya 4.3% daripada pengeluaran getah dunia, maka Malaysia tidak mampu untuk bertindak sendirian. Namun begitu, Kementerian sentiasa berusaha meneroka pasaran baharu sebagai salah satu usaha bagi menstabilkan harga komoditi getah negara.

Di peringkat antarabangsa, Malaysia komited dan terus bekerjasama dengan negara pengeluar utama getah seperti Thailand dan Indonesia di bawah kerangka *International Tripartite Rubber Council (ITRC)* bagi memperkuatkan harga getah. Di bawah kerjasama ini, syer pengeluaran ketiga-tiga negara ini adalah 67% daripada pengeluaran getah asli dunia pada tahun 2018. Skim Kuota Pengeksportan yang Dipersetujui (*Agreed Export Tonnage Scheme - AETS*) adalah mekanisme jangka pendek untuk mengurangkan bekalan getah antarabangsa.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : PUAN MARIA CHIN BINTI ABDULLAH
[PETALING JAYA]**

TARIKH : 7 OKTOBER 2019 (ISNIN)

SOALAN

Minta **PERDANA MENTERI** menyatakan dasar Kerajaan dalam menangani masalah kesenjangan harta dalam kalangan Bumiputera sehinggakan golongan 0.2% teratas pemegang unit ASB mempunyai nilai pegangan yang jauh lebih tinggi berbanding 6.5 juta pemegang unit lain.

JAWAPAN : YB TUAN MOHAMED HANIPA BIN MAIDIN

TIMBALAN MENTERI DI JABATAN PERDANA MENTERI

Tuan Yang di-Pertua,

1. Maklumat terperinci saiz pegangan Tabung Amanah Saham Bumiputera (ASB) setakat 31 Disember 2018, adalah seperti berikut:

Saiz Pegangan	Pemegang Unit		Unit Dilanggan	
	Bilangan	%	Unit	%
5000 dan ke bawah	7,433,271	76.92	4,122,520,378	2.65
5,001 hingga 10,000	443,439	4.59	2,995,355,075	1.92
10,001 hingga 50,000	901,853	9.33	21,184,981,756	13.6
50,001 hingga 500,000	862,374	8.92	109,154,775,301	70.06
500,001 dan ke atas	23,304	0.24	18,334,245,603	11.77
Jumlah	9,664,241	100.00	155,791,878,113	100

2. Setakat 31 Disember 2018, seramai lebih 9.6 juta pemegang unit telah melabur dalam Tabung ASB. Bilangan pemegang unit bagi 500,001 unit dan ke atas adalah seramai 23,304 orang atau 0.2% daripada jumlah keseluruhan pemegang unit Tabung ASB. Manakala, jumlah pegangan unit adalah sebanyak 18.3 bilion unit mewakili 11.8% daripada jumlah keseluruhan unit Tabung ASB yang dilanggan.

3. PNB berusaha memastikan setiap lapisan masyarakat Bumiputera mendapat peluang pelaburan dalam Tabung Amanah Saham Bumiputera (ASB), dengan menetapkan had pelaburan maksimum 200,000 unit bagi setiap pemegang unit, tanpa mengira tahap pendapatan individu. Pemegang unit yang memegang lebih daripada 200,000 unit mendapat manfaat daripada kuasa kompaun yang mengembangkan modal pelaburan dari tahun ke tahun sekiranya pemegang unit tidak mengeluarkan dividen atau pengagihan pendapatan yang diperolehi. Hasilnya, pelaburan berkembang untuk tempoh jangka masa yang panjang bertetapan dengan objektif pelaburan Tabung ASB.

4. Pihak PNB telah menjalankan pelbagai inisiatif untuk meningkatkan tahap simpanan/pelaburan Bumiputera dalam ASB seperti program Literasi Kewangan yang berterusan bagi menyampaikan mesej kesedaran perihal pentingnya literasi kewangan dan pelaburan dalam kehidupan. Antara program capaian yang dijalankan termasuklah Seminar Pelaburan, Fiesta Labur, Minggu Saham Amanah Malaysia (MSAM) yang mensasarkan pelbagai golongan sasaran seperti pelajar, guru, kakitangan kerajaan, pekerja swasta serta masyarakat umum.
5. Bagi memastikan setiap lapisan Bumiputera dapat menyertai ASB, pelbagai langkah diambil terutama untuk golongan Bumiputera B40 melalui Program Sosial Tajaan Kerajaan di mana para peserta yang memenuhi kriteria tertentu telah dikenalpasti oleh pihak kerajaan. Program ini mensasarkan golongan termiskin pelbagai kaum yang dikendalikan oleh ASNB seperti Program Pembiayaan Rakyat Termiskin, ASB Sejahtera, ASW 2020 Bandar, dan Skim Amanah Rakyat 1Malaysia (SARA 1M). Program ini seterusnya dapat meningkatkan pemilikan unit amanah bagi golongan tersebut.
6. Selain itu, pelbagai kaedah kemudahan pelaburan turut diperkenalkan iaitu pelaburan permulaan serendah RM10, Skim Potongan Gaji bagi menggalakkan pelaburan mengikut keupayaan individu, secara sistematik dan berterusan.
7. Kaedah pelaburan melalui pembiayaan dari bank-bank yang dibenarkan juga turut membantu golongan yang tidak mempunyai modal permulaan pelaburan namun mempunyai komitmen serta disiplin yang tinggi selaras dengan objektif pelaburan jangka masa panjang.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KE-EMPAT BELAS**

PERTANYAAN : LISAN

DARIPADA : DATO' ABDULLAH SANI BIN ABDUL HAMID [KAPAR]

TARIKH : 07 OKTOBER 2019 (ISNIN)

SOALAN

Minta **MENTERI PENGANGKUTAN** menyatakan jumlah sebenar warga asing yang diberikan kebenaran untuk bekerja sebagai pemandu kenderaan perdagangan dan penumpang.

JAWAPAN

Yang di-Pertua,

1. Untuk makluman Yang Berhormat, dasar pengeluaran lesen vokasional kepada pemohon warganegara asing telah ditetapkan pelaksanaannya melalui Arahan Jabatan Bilangan 2 Tahun 1996. Berdasarkan Arahan Jabatan tersebut, pengeluaran Lesen Memandu Kenderaan Perkhidmatan Awam (PSV) kepada warganegara asing adalah tidak dibenarkan sama sekali, tetapi permohonan Lesen Memandu Kenderaan Barang (GDL) kepada warganegara asing adalah layak dipertimbangkan berdasarkan syarat-syarat yang ditetapkan.
2. Walau bagaimanapun, berdasarkan surat pekeliling bilangan (11) JPJ/L(LM)244/3/2-16 Klt. 9 bertarikh 29 Februari 2008 telah memutuskan semua permohonan bagi pengeluaran lesen vokasional (PSV dan GDL) iaitu urusniaga permohonan baru, pembaharuan, tambah kelas, salinan, pinda butir, pewujudan rekod dan sebagainya kepada warganegara asing adalah tidak dibenarkan.
3. Dalam hubungan ini, pelaksanaan arahan ini adalah tidak melibatkan permohonan daripada warganegara Singapura. Bagi warganegara Singapura, proses pengeluaran lesen vokasional (PSV dan GDL) hanya dibenarkan dikendalikan di stesen JPJ Johor Bahru, Johor sebagaimana surat pekeliling bilangan (5) JPJ 284/1/6(3) Klt.2 bertarikh 8 Oktober 2007.
4. Berdasarkan statistik Jabatan, seramai 14,523 orang bukan warganegara telah memiliki Lesen Memandu Vokasional GDL manakala 4,439 orang telah memiliki Lesen PSV. Pecahan statistik berdasarkan tiga (3) tahun terkini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN SYED IBRAHIM BIN SYED NOH [LEDANG]

TARIKH : 7 OKTOBER 2019 (KHAMIS)

SOALAN

Minta **MENTERI HAL EHWAL EKONOMI** menyatakan bagaimanakah dasar Wawasan Kemakmuran bersama dapat membantu mengurangkan jurang kemiskinan terutama golongan miskin bandar.

JAWAPAN

Tuan Yang di-Pertua,

1. Sepertimana ahli Yang Berhormat sedia maklum, Wawasan Kemakmuran Bersama 2030 (WKB) yang telah dilancarkan pada 5 Oktober 2019 oleh YAB Perdana Menteri merupakan hala tuju baharu pembangunan negara bagi tempoh 10 tahun iaitu mulai tahun 2021 hingga 2030.
2. Menerusi WKB, pembangunan negara perlu dipertingkat supaya pendapatan negara lebih tinggi dapat dicapai serta diagihkan kepada semua rakyat Malaysia merentasi kumpulan pendapatan, etnik, pembangunan wilayah dan rantai bekalan. Pembangunan yang mampan dengan menjamin pengagihan ekonomi yang adil dan saksama serta inklusif akan mewujudkan kestabilan politik, kemakmuran negara dan kehidupan rakyat yang bersatu padu tanpa prasangka dengan meraikan kepelbagai bangsa dan budaya sebagai asas penyatuan negara bangsa.

3. Sehubungan itu, melalui WKB usaha akan dipergiat dalam meningkatkan kuasa beli rakyat dan keupayaan meningkatkan pendapatan isi rumah miskin dan berpendapatan rendah di bandar dan luar bandar supaya tidak terus ketinggalan. Dasar dan strategi serta inisiatif khusus pelaksanaan sedang giat dirangka oleh Kementerian Hal Ehwal Ekonomi dan akan dibentangkan dalam Rancangan Malaysia Kedua belas (RMKe-12) pada tahun hadapan.

4. Untuk makluman ahli Yang Berhormat, Kerajaan pada masa ini akan terus berusaha dengan perancangan yang mantap untuk meningkatkan pendapatan dan kuasa beli serta kesejahteraan isi rumah B40 terutamanya isi rumah miskin dan berpendapatan rendah di bandar dan luar bandar melalui pendekatan berikut:

- (i) Pertama, menyediakan program peningkatan pendapatan serta keperluan asas meliputi aspek perumahan, pendidikan dan kesihatan;
- (ii) Kedua, meningkatkan keupayaan mendapat pekerjaan yang berpendapatan lebih tinggi dengan membina kapasiti dan keupayaan;
- (iii) Ketiga, menggalakkan keusahawanan dan akses kepada pembiayaan kewangan untuk menjana pendapatan dengan menceburi bidang perniagaan; dan
- (iv) Keempat, meningkatkan sistem perlindungan sosial dengan mewujudkan satu rangka kerja sistem perlindungan sosial yang bersepadu dan komprehensif.

5. Segala usaha ini dijangka akan dapat memastikan tiada kumpulan isi rumah serta wilayah yang ketinggalan dan setiap rakyat dapat menikmati kemakmuran negara sejajar dengan Wawasan Kemakmuran Bersama 2030.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : **LISAN**

DARIPADA : **YB PUAN KASTHURIRAANI A/P PATOO
[BATU KAWAN]**

TARIKH : **7 OKTOBER 2019 (ISNIN)**

SOALAN NO. 28

Minta **PERDANA MENTERI** menyatakan bilangan kes seksual rogol, sumbang mahram, pencabulan, liwat, gangguan seksual dan keganasan rumahtangga dari 2014 hingga kini yang tiada tindakan lanjut (NFA), pelaku dituduh di mahkamah, pertuduhan ditarik balik, pelaku dilepaskan tanpa dibebaskan (DNAA), pelaku disabitkan kesalahan selepas perbicaraan penuh dan pelaku mengaku salah dan dihukum.

JAWAPAN : **YB DATUK LIEW VUI KEONG, MENTERI DI JABATAN PERDANA MENTERI**

Tuan Yang di-Pertuan,

1. Jabatan ini hanya mempunyai rekod berhubung dengan bilangan kes yang melibatkan jenayah rogol, sumbang mahram, cabul, luar tabii dan gangguan seksual yang dipertuduh di Mahkamah dan tiada tindakan lanjut (NFA) sahaja yang berlaku dari tahun 2014 hingga bulan Ogos 2019. Jabatan ini tiada rekod berhubung dengan maklumat lain yang diminta.

Tahun 2014

JENIS KES	BILANGAN KES DIPERTUDUH DI MAHKAMAH	BILANGAN KES TIADA TINDAKAN LANJUT (NFA)
Rogol	645	318
Sumbang Mahram	61	6
Cabul	418	40
Luar Tabii	39	8
Gangguan Seksual	2	0

Tahun 2015

JENIS KES	BILANGAN KES DIPERTUDUH DI MAHKAMAH	BILANGAN KES TIADA TINDAKAN LANJUT (NFA)
Rogol	745	858

Sumbang Mahram	36	3
Cabul	748	717
Luar Tabii	110	131
Gangguan Seksual	66	69

Tahun 2016

JENIS KES	BILANGAN KES DIPERTUDUH DI MAHKAMAH	BILANGAN KES TIADA TINDAKAN LANJUT (NFA)
Rogol	750	808
Sumbang Mahram	51	2
Cabul	670	44
Luar Tabii	128	140
Gangguan Seksual	91	85

Tahun 2017

JENIS KES	BILANGAN KES DIPERTUDUH DI MAHKAMAH	BILANGAN KES TIADA TINDAKAN LANJUT (NFA)
Rogol	721	698
Sumbang Mahram	25	3
Cabul	663	554
Luar Tabii	146	124
Gangguan Seksual	107	17

Tahun 2018

JENIS KES	BILANGAN KES DIPERTUDUH DI MAHKAMAH	BILANGAN KES TIADA TINDAKAN LANJUT (NFA)
Rogol	481	350
Sumbang Mahram	21	7
Cabul	384	176
Luar Tabii	105	44
Gangguan Seksual	90	42

Tahun 2019 (Setakat Ogos)

JENIS KES	BILANGAN KES DIPERTUDUH DI MAHKAMAH	BILANGAN KES TIADA TINDAKAN LANJUT (NFA)
Rogol	269	106
Sumbang Mahram	57	35
Cabul	183	101
Luar Tabii	44	14
Gangguan Seksual	54	24

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 7 OKTOBER 2019 (ISNIN)

SOALAN

Minta **MENTERI HAL EHWAL EKONOMI** menyatakan apakah perancangan Jabatan Perangkaan Malaysia untuk menyediakan data mikro di laman webnya dan menambah baik pangkalan data awamnya.

JAWAPAN

Tuan Yang Di-pertua,

1. Untuk makluman Ahli Yang Berhormat, Jabatan Perangkaan Malaysia (DOSM) adalah agensi statistik utama negara yang bertanggungjawab memungut, mentafsir serta menyebarkan perangkaan yang bertepatan masa dan terkini untuk memantau prestasi ekonomi dan juga pembangunan sosial negara berdasarkan mandat daripada Akta Perangkaan 1965 (Disemak-1989).
2. Dalam memastikan statistik yang diterbitkan dapat dimanfaatkan oleh masyarakat umum, pihak DOSM telah meningkatkan kebolehcapaian statistik melalui *Stats Alert* di media sosial; dan menyediakan pelbagai kemudahan di laman web Jabatan antaranya:
 - i. aplikasi e-statistik bagi memudahkan pengguna mengakses penerbitan secara percuma;

- ii. aplikasi interaktif antaranya penjanaan data penduduk sehingga peringkat daerah melalui Population Quick Info;
 - iii. penjanaan data borong & runcit hingga peringkat daerah melalui aplikasi i-DT;
 - iv. METS Online bagi penjanaan data perdagangan luar negeri sehingga 10 digit; dan
 - v. mendapatkan statistik di peringkat daerah melalui aplikasi mobile My Local Stats.
3. DOSM sedar akan keperluan analisis yang lebih terperinci memerlukan data di peringkat mikro selaras dengan peningkatan permintaan data mikro dari pelbagai peringkat pengguna. Bagi memenuhi permintaan ini, DOSM sentiasa menyesuaikan kaedah terbaik dalam pengurusan data mikro dengan menekankan penjagaan kerahsiaan maklumat responden di samping memenuhi keperluan pengguna. Maka, Dasar Penyebaran Data Mikro DOSM telah diwujudkan untuk kawalan dalaman sebagai panduan pembekalan data mikro kepada pengguna.
4. Perkongsian data mikro ini perlu diuruskan dengan teliti dan dipantau penggunaannya selaras dengan amalan *National Statistical Office* (NSO) negara-negara lain. Dasar Penyebaran Data Mikro terpakai untuk semua pengguna data mikro selagi syarat dan prosedur yang ditetapkan dalam dasar ini dipatuhi. Untuk menggalakkan penggunaan data mikro dalam aktiviti saintifik yang lebih meluas, DOSM telah menandatangani Memorandum Persefahaman (MoU) dengan 19 buah universiti di Malaysia untuk dibekalkan data mikro melalui proses *anonymisation*. Berdasarkan rekod DOSM, dari tahun 2015 sehingga September 2019 sebanyak 69 permohonan data mikro telah diterima daripada pelbagai pengguna data mikro dan sebanyak 44 permohonan telah diluluskan dan telah menandangani *Non-Disclosure Agreement* (NDA).

5. Pelaksanaan transformasi perkhidmatan penyebaran data mikro adalah salah satu daripada inisiatif modenisasi yang telah dirangka dalam Pelan Transformasi Jabatan 2015-2020. Justeru itu, DOSM telah mengambil inisiatif untuk memudahkan Pengguna mengakses data mikro terpilih dengan membangunkan platform *virtual lab* yang dijangka siap pada akhir tahun 2020. Namun begitu, DOSM sentiasa berkongsi data mikro apabila diperlukan dengan memohon secara langsung kepada DOSM untuk pertimbangan lanjut.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT, MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN KESAVAN A/L SUBRAMANIAM
[SUNGAI SIPUT]**

TARIKH : 7 OKTOBER 2019 (ISNIN)

SOALAN

Minta **PERDANA MENTERI** menyatakan pelaksanaan bagi cadangan membina rumah kos rendah untuk masyarakat Orang Asli di Parlimen Sungai Siput.

**JAWAPAN: [YB SENATOR TUAN WAYTHA MOORTHY A/L PONNUSAMY],
MENTERI DI JABATAN PERDANA MENTERI**

Tuan Yang di-Pertua,

Untuk makluman, Jabatan Kemajuan Orang Asli (JAKOA) komited untuk memastikan kemudahan asas terutama keperluan rumah Orang Asli diberi perhatian sewajarnya. Berdasarkan rekod, terdapat sebanyak 2,484 Ketua Isi Rumah (KIR) Orang Asli di Parlimen Sungai Siput dan daripada jumlah tersebut, seramai 1,960 KIR telah mempunyai rumah.

Untuk makluman, peruntukan bagi pembinaan rumah kepada masyarakat Orang Asli diterima melalui peruntukan Program Perumahan Rakyat Termiskin (PPRT) di bawah Kementerian Pembangunan Luar Bandar (KPLB) meliputi pembinaan rumah baru dan baik pulih rumah sedia ada di seluruh perkampungan Orang Asli di seluruh negara. Pada tahun 2019, sebanyak enam (6) unit rumah

NO. SOALAN : 30

bina baru dan tiga (3) unit baik pulih telah diluluskan di kawasan Sungai Siput dan ianya akan dilaksanakan oleh pihak KPLB.

Berdasarkan peruntukan yang telah diluluskan, JAKOA perlu meneliti keperluan rumah mengikut keutamaan agar pembangunan seimbang dapat dilaksanakan dan bukan hanya tertumpu di sesuatu kawasan termasuk di kawasan Sungai Siput.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KE-EMPAT BELAS**

PERTANYAAN : LISAN

**DARIPADA : Y.B. DATO' DR. HAJI NOOR AZMI BIN
GHAZALI [BAGAN SERAI]**

TARIKH : 7 OKTOBER 2019 (ISNIN)

SOALAN

Minta **MENTERI PENGANGKUTAN** menyatakan adakah MAHB sudah bersedia dengan model pelaksanaan integrasi KLIA dan KLIA 2 dan adakah perbincangan diadakan dengan pihak AirAsia dan AirAsia X yang mengendalikan 97% lalu lintas di KLIA 2.

JAWAPAN

Yang di-Pertua,

1. Untuk makluman Yang Berhormat, Malaysia Airports Holdings Berhad (MAHB) telah melancarkan projek *Seamless Connectivity* di antara kedua-dua terminal KLIA dan klia2 sejak tahun 2017. Projek ini tidak melibatkan pembinaan infrastuktur yang menelan belanja berbilion ringgit. Projek ini melibatkan beberapa fasa dan memerlukan kerjasama yang erat dengan syarikat-syarikat penerbangan dan syarikat pengendali darat (*ground handlers*) di KLIA dan klia2. Buat permulaan, pihak MAHB akan menyediakan bas “shuttle” untuk ulang-alik secara percuma bagi penumpang-penumpang yang mempunyai penerbangan sambungan atau “connecting flights” di terminal KLIA atau klia2.
2. Berhubung perbincangan dengan pihak AirAsia dan AirAsia X yang mengendalikan 97% lalu lintas di KLIA 2 mengenai model perlaksanaan integrasi tersebut, pihak MAHB sememangnya telah mengadakan beberapa siri perbincangan bersama pihak berkenaan dan terdapat beberapa cadangan dan idea baharu yang sedang diperhalusi bagi menjayakan inisiatif ini. Pihak MAHB sentiasa terbuka untuk sebarang perbincangan lanjut dengan mana-mana pihak yang berkaitan pada masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : PUAN VIVIAN WONG SHIR YEE
[SANDAKAN]**

TARIKH : 7 OKTOBER 2019 (ISNIN)

SOALAN NO. 34

Minta **MENTERI HAL EHWAL EKONOMI** bagaimana Visi Berkongsi Kemakmuran akan dilaksanakan di Sabah dan Sarawak dan apakah jangka masa yang ditetapkan untuk membawa pembangunan sosioekonomi di kedua-dua negeri tersebut setaraf dengan negeri-negeri di Semenanjung Malaysia.

JAWAPAN

Tuan Yang di-Pertua,

1. Sepertimana Ahli Yang Berhormat sedia maklum, Wawasan Kemakmuran Bersama 2030 (WKB) telah dilancarkan pada 5 Oktober 2019 yang lalu merupakan hala tuju baharu pembangunan ekonomi negara.
2. Antara objektif WKB adalah menangani jurang kekayaan dan pendapatan. Objektif ini bertujuan untuk merapatkan jurang ekonomi antara kumpulan pendapatan, etnik, wilayah dan rantaian bekalan. Bagi merapatkan jurang antara wilayah, Teras Strategi 6, iaitu Keterangkuman Wilayah telah digagaskan merangkumi Sabah dan Sarawak.
3. Sehubungan itu, Kerajaan akan memastikan pembangunan ekonomi tidak berpusat dari segi wilayah geografi. Strategi ini melibatkan pengagihan pembangunan kepada semua negeri di Malaysia secara saksama tanpa mengira lokasi.
4. Sementara itu, Kerajaan akan terus memperkasa kumpulan minoriti termasuk Bumiputera Sarawak dan Anak Negeri Sabah terutamanya yang tinggal di kawasan pedalaman. Inisiatif akan terus dipertingkat bagi menangani kemiskinan disebabkan ketinggalan dalam aspek pendidikan, kemahiran dan keusahawanan, berikutan akses yang terhad kepada peluang dan kemudahan asas.
5. Sehubungan itu, selaras dengan Kajian Separuh Penggal Rancangan Malaysia Kesebelas (KSP RMKe-11), Tonggak II: Memperkuatkan Pembangunan Inklusif dan Kesejahteraan Rakyat, beberapa inisiatif dilaksanakan untuk meningkatkan taraf hidup Anak Negeri Sabah dan Bumiputera Sarawak tersebut, seperti berikut:

- I. Mempertingkat pengambilan pelajar berpotensi untuk kemasukan ke sekolah berprestasi tinggi dan institut latihan;
 - II. Memupuk keusahawanan dengan memberi fokus terhadap program kemahiran keusahawanan berdasarkan bakat intrinsik kumpulan sasar dan dilengkapi dengan bantuan seperti kemudahan pembiayaan serta pembungkusan dan pemasaran produk; dan
 - III. Mempercepat proses pemberian hak milik tanah bagi membolehkan tanah tersebut dimanfaatkan untuk aktiviti ekonomi
6. Bagi merapatkan jurang antara wilayah, pembangunan akan dibawa ke seluruh negara terutamanya negeri yang kurang membangun. Bagi memastikan kejayaan untuk mengurangkan jurang pembangunan antara wilayah, Kementerian Hal Ehwal Ekonomi telah melaksanakan sesi libat urus bersama semua Kerajaan Negeri sebagai satu pendekatan baharu yang diambil di bawah RMKe-12 agar dasar yang akan dibentuk lebih holistik dan inklusif.
7. Di samping itu, bantuan bagi meningkatkan pendapatan dan isi rumah B40 termasuk yang tinggal di Sabah dan Sarawak akan terus dilaksanakan. Ini adalah juga bertujuan untuk meningkatkan kapasiti dan keupayaan isi rumah supaya dapat meningkatkan peluang mendapatkan pekerjaan, menggalakkan keusahawanan dan meningkatkan produktiviti.
8. Segala usaha ini dijangka dalam masa panjang akan dapat memastikan tiada kumpulan isi rumah serta wilayah yang ketinggalan dan setiap rakyat dapat menikmati kemakmuran negara sejajar dengan Wawasan Kemakmuran Bersama 2030.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN AKMAL NASRULLAH BIN
MOHD. NASIR [JOHOR BAHRU]**

TARIKH : 07 OKTOBER 2019 (ISNIN)

SOALAN

Minta **MENTERI SUMBER MANUSIA** menyatakan:-

- (a) angka terkini jumlah pekerja asing di Malaysia ; dan
- (b) sasaran Kementerian mengenai jumlah pekerja asing yang diperlukan dalam industri buruh di Malaysia .

JAWAPAN

Tuan Yang Dipertua,

1. Berdasarkan statistik Jabatan Imigresen Malaysia sehingga 31 Ogos 2019, jumlah pekerja asing yang berdaftar dan dikeluarkan Pas Lawatan Kerja Sementara (PL(KS)) adalah 1,994,120 orang. Sektor perkilangan adalah sektor tertinggi yang menggajikan pekerja asing iaitu seramai 706,502, diikuti sektor pembinaan 429,552, sektor perladangan 268,203, sektor pertanian 150,003 dan pembantu rumah 130,450.
2. Berhubung dengan sasaran Kementerian berhubung jumlah pekerja asing yang diperlukan, Kerajaan masih berpegang kepada penetapan di bawah Rancangan Malaysia ke-11 iaitu menetapkan had penggajian pekerja asing di Malaysia tidak melebihi 15% daripada jumlah guna tenaga negara pada tahun 2020. Pelbagai langkah telah diambil dalam mencapai ketetapan ini khususnya menggalakkan industri beralih ke arah automasi melalui pelaksanaan Industri 4.0, *exit strategy* mengurangkan kebergantungan pekerja asing, latihan kepada pekerja tempatan, cadangan pelaksanaan *multi tier levy* dan sebagainya.

**PEMBERITAHUAN PERTANYAAN
MESYUARAT KETIGA, PENGGAL KEDUA
PARLIMEN KEEMPAT BELAS DEWAN RAKYAT**

PERTANYAAN : LISAN

DARIPADA : TUAN NOOR AMIN BIN AHMAD [KANGAR]

TARIKH : 7 OKTOBER 2019

SOALAN

TUAN NOOR AMIN BIN AHMAD [KANGAR] minta **PERDANA MENTERI** menyatakan apakah langkah-langkah yang diambil oleh Kerajaan untuk menangani masalah simpanan dan pencen yang terlalu rendah bagi kakitangan awam dan swasta yang berpangkat rendah.

**JAWAPAN: YB TUAN MOHAMED HANIPA BIN MAIDIN
TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, pihak Jabatan Perkhidmatan Awam (JPA) ada menyediakan kursus-kursus kepada bakal pesara dan pesara dengan kerjasama Kementerian dan jabatan Kerajaan lain untuk membantu dari aspek kewangan. Antara program-program yang telah diadakan adalah:

- I. Program Agropreneur Muda yang diadakan dengan kerjasama Kementerian Pertanian dan Industri Asas Tani;
- II. *Business Opportunity Seminar* dengan kerjasama Kementerian Pembangunan Usahawan; dan
- III. Program e-Rezeki dengan kerjasama Malaysia Digital Economy Cooperation (MDEC).

Merujuk kepada Peraturan-peraturan Pencen 1980, pengiraan pencen kepada penjawat awam adalah berasaskan kepada tempoh perkhidmatan yang boleh diambilkira tertakluk maksimum 3/5 daripada gaji akhir.

Bagi situasi dimana pegawai dibersarakan atas sebab kesihatan, kematian dalam perkhidmatan atau penswastaan, pencen minimum yang boleh diberikan kepada pegawai adalah 1/5 daripada gaji akhir. Manakala bagi pegawai yang telah berkhidmat sekurang-kurangnya 25 tahun tempoh perkhidmatan yang boleh diambilkira, pegawai akan menerima pencen terendah sebanyak RM1,000.00 sekiranya pengiraan pencen adalah kurang daripada jumlah tersebut.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK HAJI SHABUDIN BIN YAHAJA
[TASEK GELUGOR]**

TARIKH : 07 OKTOBER 2019 (ISNIN)

SOALAN

Minta **MENTERI SUMBER MANUSIA** menyatakan apakah pihak Kementerian bercadang untuk merangka rancangan jangka masa pendek dan jangka masa panjang dalam menangani keseimbangan tenaga kerja dan peluang pekerjaan dalam negara menjelang pertambahan jumlah penduduk Malaysia yang telah mencecah 32.58 juta pada suku tahun kedua bagi tahun 2019.

JAWAPAN

1. Kementerian Sumber Manusia melalui *Institute of Labour Market Information and Analysis (ILMIA)* telah mengambil langkah pro-aktif merangka rancangan jangka masa pendek dan jangka panjang dalam menangani isu keseimbangan tenaga kerja dan peluang pekerjaan dalam negara ekoran pertambahan jumlah penduduk Malaysia yang mencecah 32.58 juta.
2. Langkah jangka pendek yang telah dilaksanakan oleh ILMIA adalah dengan melakukan kajian imbasan persekitaran (*environmental scan*) yang memfokuskan kepada industri-industri yang terpilih dan di senarai pendek. Kajian ini bertujuan untuk :-
 - i. membangunkan landskap industri (gambaran dan pandangan industri) dengan menganalisa trend industri dan sub-sektor di bawahnya,
 - ii. menganalisa profil tenaga kerja sedia ada dan yang diperlukan industri,
 - iii. mengkaji keperluan kemahiran atau skil industri yang berkaitan,
 - iv. mengkaji keperluan pembangunan kurikulum dan penyediaan latihan kepada tenaga kerja industri,
 - v. memahami tahap permintaan dan penawaran bakat (kemahiran, kelayakan akademik, pengalaman kerja dan lain-lain).
3. Hasil dapatan imbasan persekitaran yang diperolehi di panjangkan kepada industri yang terbabit bagi membolehkan mereka mengambil langkah pembetulan, penambahbaikan dan pengekalan yang diperlukan.

SOALAN NO : 37

4. Kajian-kajian imbasan persekitran yang telah dilaksanakan adalah seperti “Food & Beverage”; “Human Capital Issue: Equipment and Advanced Engineering Sector”; “Human Capital Issue: Services Activities Sector”; “E-Scan : Food and Beverage Sector- Expansion on the Halal Industry”; “Human Capital Issue: Shipbuilding and Ship Repair Sector”; dan sebagainya.
5. Selain dari itu, Kementerian Sumber Manusia melalui ILMIA dan Talent Corp juga telah mewujudkan “Critical Occupation List” (COL) atau senarai pekerjaan kritikal yang menyaksikan penyenaraian jawatan atau pekerjaan kritikal yang perlu pengisian segera dengan pematuhan keperluan kemahiran, kelayakan akademik, pengalaman kerja dan sebagainya bagi industri.
6. Senarai ini dapat membantu kerajaan dalam mengkoordinasi polisi serta memberi keutamaan terhadap inisiatif program dana awam seperti penawaran biasiswa, program “*up-skilling*” dan program “*re-skilling*” untuk meningkatkan penawaran pekerja berkemahiran kepada industri tempatan.
7. Sebagai usaha jangka panjang dalam menyeimbangkan keperluan tenaga kerja dengan peluang pekerjaan pula, Kementerian Sumber Manusia melalui ILMIA sedang dalam usaha mewujudkan Pelan Pembentukan Sumber Manusia Kebangsaan atau *National Human Resource Blueprint (NHRBP) 2019 – 2035*.
8. Pelan ini akan bertindak sebagai payung yang akan menyatukan semua rangka kerja polisi sedia ada berhubung perburuhan kebangsaan dan sumber manusia yang dikuatkuasakan oleh pelbagai agensi kerajaan. Pelan ini juga akan membantu kerajaan menggariskan dasar dan polisi sumber manusia yang menyokong dan memenuhi keperluan industri 4.0 serta bagi meningkatkan pengetahuan, kreativiti, keusahawanan, perlindungan sekuriti sosial, penawaran upah yang lebih tinggi dan produktiviti dalam usaha menambahbaik kebajikan pekerja disamping mempertingkatkan kemakmuran ekonomi negara.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN PRABAKARAN A/L M PARAMESWARAN
[BATU]**

TARIKH : 7 OKTOBER 2019 (ISNIN)

SOALAN

TUAN PRABAKARAN A/L M PARAMESWARAN [BATU] minta **MENTERI WILAYAH PERSEKUTUAN** menyatakan adakah Kementerian mempunyai rancangan untuk mengadakan operasi bersepadu di Pasar Borong Selayang memandangkan tindakan hanya dapat diambil apabila mempunyai kerjasama di antara DBKL, PDRM, Imigresen dan lain-lain terhadap pekerja dan peniaga warga asing tanpa permit.

JAWAPAN

Tuan Yang Di Pertua,

Untuk makluman Yang Berhormat Batu, Kementerian Wilayah Persekutuan (KWP) melalui Dewan Bandaraya Kuala Lumpur (DBKL) bersama Kementerian Dalam Negeri (KDN) telah menubuhkan *Task Force* bagi membincangkan masalah kebanjiran warga asing yang bermiaga di Pasar Borong yang dikenali sebagai **Operasi TEGAS**. Operasi TEGAS adalah **tindakan bersepadu** ke atas penjaja warga asing bersama-sama dengan agensi Kerajaan lain seperti Kementerian Perdagangan Dalam Negeri dan Hal Ehwal Pengguna (KPDNHEP), Polis DiRaja Malaysia (PDRM), Jabatan Imigresen Malaysia (JIM), Jabatan Pendaftaran Negara (JPN), Suruhanjaya Pencegahan Rasuah Malaysia (SPRM), Jabatan Sukarelawan Malaysia (RELA), Kementerian Luar Negeri (KLN),

SOALAN NO : 38

Kementerian Perumahan dan Kerajaan Tempatan (KPKT), Majlis Keselamatan Negara (MKN), Majlis Perbandaran Subang Jaya dan jabatan-jabatan dalaman DBKL.

Tuan Yang Di Pertua dan Ahli-Ahli Yang Berhormat,

Sepanjang **Januari hingga Ogos 2019**, sebanyak **2 siri Operasi TEGAS** telah diadakan di Pasar Borong Selayang dengan **60 tindakan sita barang perniagaan penjaja warga asing** disamping seramai **30 orang warga asing** telah ditangkap untuk tindakan **JIM**. Jabatan akan meneruskan tindakan operasi bersepadu dari semasa ke semasa.

Isu utama yang dilihat semasa pemantauan pihak penguatkuasa adalah seperti kebanjiran warga asing tanpa dokumen yang sah yang bekerja dan menguasai perniagaan, pemegang kad UNHCR yang menjalankan aktiviti perniagaan dan keadaan lalulintas yang sesak dan tidak teratur disebabkan kewujudan peniaga haram warga asing. Sehubungan dengan itu, antara tindakan yang telah diambil adalah menjalankan operasi bersepadu di antara agensi-agensi penguatkuasaan secara berterusan. Operasi bersepadu ini dilihat membantu dalam mengurangkan masalah kebanjiran warga asing dengan tangkapan yang dilakukan ke atas majikan dan pekerja warga asing tanpa permit, tindakan ke atas peniaga yang melanggar syarat lesen seperti menggaji warga asing atau menyewakan lesen kepada pihak ketiga terutama kepada warga asing

DBKL juga ada menempatkan anggota penguatkuasa seramai **20 orang petugas** untuk tindakan secara **pemantauan dan rondaan harian** di Pasar Harian Selayang. Namun begitu, tindakan harian ini hanya membolehkan DBKL menyita pelbagai barang milik penjaja warga asing atas faktor perwakilan kuasa yang terhad. Sepanjang **Januari hingga Ogos 2019** sebanyak **950 tindakan pelbagai barang perniagaan penjaja warga asing telah disita**.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KE-EMPAT BELAS**

PERTANYAAN : LISAN

**DARIPADA : Y.B. DATO' SERI HISHAMMUDDIN BIN TUN
HUSSEIN [SEMBRONG]**

TARIKH : 7 OKTOBER 2019 (ISNIN)

SOALAN

Minta **MENTERI PENGANGKUTAN** menyatakan apakah hasil laporan siasatan kegagalan rangkaian yang menyebabkan masalah sistem di Lapangan Terbang Antarabangsa Kuala Lumpur (KLIA) pada bulan Ogos yang lalu dan apakah tindakan yang dilakukan oleh pihak Kementerian dalam menangani isu tersebut.

JAWAPAN

Yang di-Pertua,

1. Untuk makluman Yang Berhormat, isu mengenai gangguan sistem rangkaian di KLIA yang bermula pada 21 Ogos 2019 lalu telah distabilkan pada 24 Ogos dan ianya masih dipantau oleh syarikat pengendali KLIA iaitu Malaysia Airports Holdings Berhad (MAHB). Kerajaan juga telah mengarahkan MAHB untuk mempertingkatkan keselamatan sistem rangkaian di KLIA dan juga mengarahkan pihak Berkusa Penerbangan Awam Malaysia (CAAM) untuk menyelaras dan memantau usaha bagi mempertingkatkan keselamatan sistem tersebut.
2. Untuk makluman Ahli Yang Berhormat, penyiasatan terhadap sistem rangkaian di KLIA ini termasuklah dakwaan terdapatnya kemungkinan unsur khianat atau sabotaj masih dalam proses siasatan pihak Polis DiRaja Malaysia (PDRM).
3. Kerajaan melalui Kementerian Pengangkutan telah menuuhkan suatu Jawatankuasa Peringkat Kementerian yang dianggotai oleh pakar-pakar dari Suruhanjaya Penerbangan Malaysia (MAVCOM), CAAM dan Agensi Keselamatan Siber Negara (NACSA) seperti yang yang telah diumumkan pada 26 Ogos 2019 yang lalu. Jawatankuasa tersebut diberi masa 30 hari untuk melaksanakan siasatan secara terperinci. Laporan penuh lengkap hasil siasatan tersebut sedang dimuktamadkan dan ianya akan dibentangkan kepada Jemaah Menteri pada Oktober 2019.
4. Selain menyiasat punca sebenar permasalahan yang berlaku, PDRM dan Jawatankuasa Peringkat Kementerian juga akan mengenalpasti implikasi serta kesan terhadap perkhidmatan di lapangan terbang merangkumi Total Airports Management System (TAMS) serta beberapa sistem yang berkaitan serta mencadangkan langkah-langkah penambahbaikan bagi mengelakkan insiden yang sama untuk berulang pada masa hadapan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATIN PADUKA DR. TAN YEE KEW
[WANGSA MAJU]**

TARIKH : 7 OKTOBER 2019

SOALAN

Minta **MENTERI BELIA DAN SUKAN** menyatakan adakah Kementerian berhasrat untuk membina sebuah kompleks sukan di Wangsa Maju bagi memenuhi keperluan belia di kawasan ini memandangkan populasi penduduk adalah sekitar 800,000 orang.

JAWAPAN

Yang di-Pertua,

1. Untuk makluman Ahli Yang Berhormat, Kementerian Belia dan Sukan buat masa ini tiada perancangan untuk membina sebuah kompleks sukan di kawasan Wangsa Maju. Walau bagaimanapun, Kementerian ini bersedia untuk melihat semula kemudahan sukan di kawasan Wangsa Maju dan keperluan pembinaan sebuah kompleks sukan baharu untuk digunakan oleh penduduk tempatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI AHMAD JAZLAN BIN YAAKUB
(MACHANG)**

TARIKH : 7 OKTOBER 2019 (ISNIN)

SOALAN

minta **PERDANA MENTERI** menyatakan apakah pendekatan baru yang diambil oleh pihak Kerajaan untuk memastikan isu sensitif 3R (*race, religion, royalty*) akan kekal dihormati oleh masyarakat berbilang kaum bagi mengekalkan keharmonian di Malaysia.

JAWAPAN : YB SENATOR TUAN WAYTHA MOORTHY A/L PONNUSAMY, MENTERI DI JABATAN PERDANA MENTERI (PERPADUAN NEGARA DAN KESEJAHTERAAN SOSIAL)

Yang di-Pertua,

Kerajaan mengetahui bahawa pentingnya perpaduan dan integrasi nasional dalam kalangan masyarakat majmuk di Malaysia yang terdiri daripada pelbagai suku kaum dan etnik serta latar belakang agama, budaya dan bahasa yang berbeza. Justeru, Kerajaan memahami bahawa isu-isu sensitif yang berkaitan dengan 3R (*race, religion and royalty*) perlu diurus dan ditangani secara halus dan baik agar tidak menyinggung perasaan mana-mana pihak yang berkaitan demi mewujudkan sikap saling hormat-menghormati antara rakyat Malaysia dan mengekalkan keharmonian negara.

Mengambil kira kerencaman isu-isu 3R ini, Jabatan PERPADUAN telah, sedang dan akan meneruskan pelbagai usaha bagi memperkuuhkan perpaduan dalam kalangan masyarakat Malaysia menggunakan pendekatan mendamping dan mendidik (*engage and educate*) melalui pelbagai program dan mekanisme. Antara pendekatan baharu yang diambil oleh Kerajaan untuk memastikan isu sentitif 3R (race, religion, royalty) akan kekal dihormati oleh masyarakat berbilang kaum di negara ini adalah seperti berikut:

- (i) Menggunakan media baru sebagai wacana penyampaian maklumat dengan cara yang lebih moden dan terkini melibatkan forum-forum, blog-blog yang mudah difahami dan ditulis oleh penyampai maklumat yang mengutarakan maklumat yang tepat, berita yang benar serta fakta-fakta yang bernas untuk kepentingan seluruh individu masyarakat secara penuh beretika dan bertanggungjawab di samping memastikan media arus perdana dan agensi penerangan digalakkan untuk mendidik masyarakat akan kepentingan menghormati sensitiviti 3R dalam mengekalkan perpaduan dan keharmonian yang berterusan;
- (ii) Meningkatkan kefahaman silang budaya melalui penganjuran program-program ke arah jalinan integrasi nasional untuk merapatkan hubungan di antara rakyat agar tidak wujud sikap prasangka terhadap satu sama lain seperti program menyantuni masyarakat minoriti melibatkan komuniti Orang Asli, Siam, Baba Nyonya di Semenanjung dan komuniti Rungus di Sabah;
- (iii) Meluaskan program-program pendidikan perpaduan bertujuan mendidik rakyat menghayati pengertian perpaduan serta menyemai prinsip-prinsip Rukun Negara dan nilai-nilai murni agar dapat membina satu negara bangsa yang utuh dan tidak mudah dimanipulasikan oleh kuasa luar seperti penganjuran Forum Perpaduan Sekretariat Rukun Negara pada Oktober 2019 yang bertajuk “Rukun Negara Bukan Untuk Dihafal”;
- (iv) Melatih pemimpin-pemimpin masyarakat dengan kemahiran pendamaian atau mediasi supaya apa-apa pertelingkahan dan pergeseran yang berlaku di peringkat akar umbi mampu

diselesaikan secara baik dan sekaligus menggalakkan interaksi dan penjalinan hubungan baik dalam kalangan komuniti yang terdiri dari pelbagai etnik;

- (v) Menjalinkan perkongsian strategik bersama institusi-institusi pengajian tinggi dan institusi pemikir (*think-tank institutions*) untuk berkongsi hasil kajian, wacana, perbincangan, pandangan mengenai hubungan etnik dan perpaduan nasional seperti penganjuran Program Kau Sumber Inspirasiku bersama Persatuan Siswazah Wanita Malaysia pada bulan Jun 2019;
- (vi) Menggalakkan keharmonian agama dan persefahaman di kalangan penganut pelbagai agama melalui pendekatan dialog dan wacana supaya memupuk persefahaman dan mencari penyelesaian atau pendamaian antara penganut pelbagai agama seperti penganjuran Harmony Walk di peringkat negeri dan kebangsaan serta dialog harmoni bertajuk “*The Importance of Inter-Religious Understanding to National Unity*” pada Ogos 2019;
- (vii) Menganjurkan lebih banyak sesi perbincangan, konferens, bengkel, wacana, *contestation of ideas* dan perdebatan melibatkan golongan muda melalui pendekatan berorientasikan idea bagi mengupas isu berbangkit dalam hubungan antara kaum seperti penganjuran persidangan bertajuk Conference on *Countering Hate Speech and Intolerance in Malaysia* dan bengkel bertajuk “*Identifying and Countering Hate Speech Against Minorities*” serta Wacana Perpaduan di Hati Ke Arah Kelestarian dan Pengukuhan Hubungan Etnik pada bulan Julai 2019;
- (viii) Menganjurkan Program Detik-Detik Perpaduan (*Moments of Unity*) secara berterusan yang bertujuan membentuk sebuah bangsa Malaysia yang bersatu padu dengan memberi penekanan untuk meningkatkan kesedaran, penghayatan dan amalan nilai-nilai murni kepada kumpulan sasar yang merentasi golongan kanak-kanak, pelajar, belia, wanita dan akhirnya merangkumi semua lapisan masyarakat seperti Karnival Membudayakan Perpaduan dan Meraikan Kepelbagaian, Festival Baba Nyonya, *Mid Autumn*

Festival Unity 2019, Cafe Perpaduan : Demi Negara Tercinta dan Konvoi Muhibah dari bulan Jun – September 2019;

- (ix) Memperluas dan mempergiatkan usaha-usaha promosi dan menyebarluaskan mesej-mesej perpaduan dalam memupuk nilai dan semangat perpaduan sepanjang tahun dengan penglibatan pelbagai Kementerian dan agensi serta badan-badan korporat, badan bukan kerajaan (NGO) dan pihak swasta melalui pelaksanaan pelbagai program seperti forum perpaduan, *Unity Fun Run, Run for Peace, Fun Walk* : 10 Ribu Langkah Perpaduan, *MyHero Awards, Unity Fiesta, Say Something Nice, National Unity Week bersama IOI City Mall* di Putrajaya, AEON di Ipoh, Perak dan Pusat Membeli-Belah Alamanda, Putrajaya dari bulan Julai – September 2019;
- (x) Mengadakan program Perhimpunan Perpaduan Demi Negara di seluruh negara melalui jaringan kerjasama strategik antara kepimpinan Rukun Tetangga (RT), Persatuan Penduduk (RA), Badan Bukan Kerajaan (NGO), organisasi masyarakat sivil (CSO) serta badan-badan korporat di seluruh negara bagi memantapkan interaksi dan hubungan kerjasama antara RT, RA, NGO, CSO dan badan-badan korporat serta pihak swasta agar dapat bersama-sama melaksanakan program dan aktiviti kejiranan secara bersepadu untuk meningkatkan semangat perpaduan dan kesejahteraan komuniti setempat;
- (xi) Mewujudkan pasukan pemantau isu-isu semasa perpaduan di media sosial peringkat Jabatan termasuk pejabat perpaduan negeri dan daerah untuk menyebarkan berita-berita positif agar dapat menenangkan keadaan (*counter*) penyebaran berita-berita palsu, negatif dan berunsur fitnah supaya dapat menyakinkan masyarakat agar tidak mudah percaya dengan isu dan berita sensitif mengenai 3R yang dimainkan dalam media sosial dan inisiatif ini akan diperluaskan ke peringkat akar umbi dengan penglibatan Rukun Tetangga; dan

- (xii) Menguatkuasakan undang-undang sedia ada untuk mempertahankan keharmonian dan kedaulatan Institusi Diraja. Antaranya Akta Hasutan 1948 [Akta 15], Kanun Keseksaan [Akta 574] dan Akta Komunikasi dan Multimedia 1998 [Akta 588] yang boleh digunakan untuk mengambil tindakan ke atas pihak yang didapati telah membangkitkan isu-isu sensitif melibatkan agama, kaum dan Institusi Diraja.

Jabatan PERPADUAN selaku agensi peneraju dalam memelihara keharmonian dan memperkuatkan perpaduan masyarakat pelbagai kaum di negara ini terus komited melaksanakan pelbagai program yang melibatkan anggota komuniti dari pelbagai lapisan masyarakat di negara ini. Pelaksanaan program-program sedemikian akan membuka ruang yang lebih luas kepada rakyat untuk berinteraksi yang akhirnya akan membawa kepada pembentukan perhubungan manusia yang rapat sehingga akan melahirkan bibit-bibit perpaduan dan rasa kekitaan.

Namun, memandangkan usaha mempromosikan perpaduan adalah tanggungjawab bersama maka adalah menjadi harapan kerajaan agar semua pihak termasuk ahli-ahli politik, pemimpin-pemimpin masyarakat, aktivis-aktivis negara dan rakyat sendiri memainkan peranan masing-masing sebagai warga negara yang bertanggungjawab dengan tidak mengeluarkan ataupun menularkan sebarang kenyataan berunsur perkauman dan agama supaya tidak menimbulkan sebarang sensitiviti dan prejudis antara masyarakat Malaysia demi menjaga dan memelihara hubungan baik antara mereka.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : YB TUAN KHAIRY JAMALUDDIN [REMBAU]

TARIKH : 7 OKTOBER 2019 (ISNIN)

SOALAN

Minta **MENTERI HAL EHWAL EKONOMI** menyatakan berapakah nilai aset dan liabiliti serta prestasi perniagaan mengikut suku tahunan bagi syarikat-syarikat GLIC serta GLC iaitu Khazanah, MOF Inc., PNB, KWSP, KWAP, Tabung Haji dan LTAT bagi tempoh 2017 hingga data terkini tahun 2019.

JAWAPAN

Tuan Yang di-Pertua,

1. Untuk makluman Ahli Yang Berhormat, secara amnya, tahun 2018 merupakan tahun yang amat mencabar yang menyaksikan pasaran seluruh dunia terjejas teruk akibat ketegangan geopolitik dan suasana pertumbuhan yang suram bagi pasaran baru muncul.
2. Di peringkat domestik pula, prospek pendapatan yang lemah, ketidaktentuan pasaran telah memberikan kesan negatif kepada beberapa Syarikat Pelaburan Berkaitan Kerajaan (GLIC) termasuk Khazanah Nasional Berhad (Khazanah).
3. Pada tahun 2018, nilai portfolio Khazanah yang diukur menerusi Nilai Bersih Dilaraskan (*Net Worth Adjusted*, NWA) merosot kepada RM91 bilion pada 31 Disember 2018, penurunan 21.6% daripada RM116 bilion pada 31 Disember 2017.

4. Dalam persekitaran yang mencabar ini, bagi memperbaiki kedudukan Khazanah, Kerajaan telah mengambil keputusan untuk melaksanakan penstrukturkan semula yang melibatkan perubahan kepimpinan dalam Lembaga Pengarah dan Pengurusan serta pengenalan mandat dan objektif yang baharu. Seterusnya, Khazanah telah melaksanakan penilaian semula semua pelaburannya bagi meletakkan Khazanah pada kedudukan yang lebih kukuh pada masa hadapan.

5. Untuk makluman ahli Yang Berhormat, Khazanah hanya melaporkan keputusan kewangan secara tahunan sahaja dan tidak mengikut suku tahun. Pelaporan ini diumumkan semasa Ulasan Tahunan Khazanah pada awal tahun dan seterusnya dikemukakan kepada Suruhanjaya Syarikat Malaysia, selepas ianya diaudit dan disahkan oleh Lembaga Pengarah Khazanah. Jumlah aset Khazanah pada Tahun Kewangan (TK) 2018 adalah RM86.9 bilion berbanding RM92.6 bilion pada TK 2017 sementara jumlah liabiliti Khazanah pada TK 2018 pula adalah RM55.9 bilion berbanding RM51.2 bilion pada TK 2017.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. NORAINI AHMAD
(PARIT SULUNG)**

TARIKH : 7 OKTOBER 2019 (ISNIN)

SOALAN

Minta **PERDANA MENTERI** menyatakan apakah faktor yang menjadi penghalang Kerajaan dalam merangka mekanisme dan inisiatif bagi memupuk perpaduan berbilang kaum yang makin meruncing di dalam negara.

JAWAPAN : YB SENATOR TUAN WAYTHA MOORTHY A/L PONNUSAMY, MENTERI DI JABATAN PERDANA MENTERI (PERPADUAN NEGARA DAN KESEJAHTERAAN SOSIAL)

Yang di-Pertua,

Pada hakikatnya, masyarakat Malaysia bukan berasal daripada satu bangsa yang sama, satu kepercayaan agama yang serupa dan bahasa yang serumpun. Perpaduan yang kita bina selama ini dan berjaya dipertahankan sehingga sekarang adalah kerana atas dasar saling mempercayai dan hormat-menghormati antara rakyat Malaysia. Justeru, semangat perpaduan antara kaum di negara ini perlu dipupuk dan dipelihara secara berterusan. Namun, antara cabaran-cabaran yang sering menjadi penghalang dalam merangka mekanisme dan inisiatif bagi memupuk perpaduan adalah:

(i) Faktor Kepelbagaian Masyarakat

Malaysia merupakan sebuah negara pluralistik dengan kelompok majoriti bangsa Melayu diikuti dengan etnik Cina, India, kelompok peribumi kecil seperti Dayak, Bidayuh, Kadazan-dusun dan Bajau di Sabah dan Sarawak serta masyarakat Orang Asli. Selepas mencapai kemerdekaan, usaha-usaha ke arah pengukuhan hubungan antara etnik telah dipergiatkan. Manakala selepas penyertaan Sabah dan Sarawak bersama Semenanjung menjadi negara Malaysia pada tahun 1963, usaha-usaha mengintegrasikan masyarakat antara wilayah telah diperkuuh dan diperluaskan. Selain itu, pemahaman dan penerimaan masyarakat Semenanjung terhadap budaya hidup masyarakat di Sabah dan Sarawak adalah kurang dan begitu juga di sebaliknya. Justeru, aspek kepelbagaian yang meliputi perbezaan dari segi etnik, agama, budaya dan bahasa menyebabkan masyarakat kita kadang kala mengalami ketidakserasan dan ini seterusnya menjadikan usaha ke arah penyatuan nasional.

(ii) Faktor Politik

Sememangnya sikap tidak bertanggungjawab dalam kalangan segelintir ahli-ahli politik dan pemimpin masyarakat menyebabkan usaha mempromosikan perpaduan nasional tergugat. Ini kerana mereka pada kebiasaan sering menimbulkan isu-isu perkauman dan agama dan memanipulasikannya sehingga mewujudkan sensitiviti antara etnik yang menguatkan lagi sikap prejudis dan mengakibatkan semangat perkauman yang tinggi. Ini menjadikan pengaruh perkauman turut merebak merentasi institusi keluarga dan sektor pendidikan. Apabila situasi sebegini berlaku, maka, setiap etnik akan memperjuangkan kepentingan kaum masing-masing terutamanya hal-hal yang berkaitan dengan agama, bahasa, budaya dan pendidikan dan seterusnya mengakibatkan perpecahan berlandaskan unsur perkauman.

(iii) Agama dan Kebudayaan

Setiap kumpulan etnik mempunyai agama dan kebudayaan yang berlainan. Setiap kaum pula mempunyai adat resam, bahasa, kesenian, budaya dan sistem nilai yang berbeza. Masing-masing kurang mengenali dan memahami antara satu sama lain dan sering kali menganggap mereka sahaja yang terbaik. Sikap ini menguatkan prasangka buruk yang akan menghalang pergaulan baik antara pelbagai kaum.

(iv) Pengaruh Media Sosial

Pengaruh media sosial menjadi ancaman baharu perpaduan masyarakat berbilang kaum di negara ini berikutan tindakan pihak tidak bertanggungjawab menggunakannya untuk menyebarkan fitnah dan berita-berita palsu yang boleh menjaskan keharmonian rakyat. Pengguna media sosial perlu berhenti berkongsi cerita yang tidak disahkan kebenarannya kerana ia hanya membawa kepada perpecahan masyarakat. Masyarakat tidak boleh tunduk dan terpengaruh dengan ideologi yang disebarluaskan bertujuan menyemai rasa kebencian dan syak wasangka antara kaum dan agama di negara ini.

(v) Identiti Nasional

Sebenarnya ideologi kebangsaan negara iaitu Rukun Negara telah menggariskan dengan jelas mengenai identiti nasional yang perlu dimiliki oleh setiap warganegara ini di mana dalam mukadimahnya sendiri telah ditekankan kepada pencapaian perpaduan yang lebih erat dalam kalangan seluruh masyarakat, memelihara cara hidup berdemokratik, mencipta satu masyarakat yang adil dan saksama, menjamin satu cara hidup yang kaya dengan pelbagai corak serta membina satu masyarakat yang progresif. Namun, masih terdapat dalam kalangan rakyat Malaysia yang tidak mempertahankan identiti nasional atau prinsip asas kenegaraan. Ini kerana mereka masih gagal memahami dan menghayati intipati dan roh Rukun Negara yang sebenarnya yang turut menjadi faktor penghalang dalam

menyemarakkan semangat perpaduan dan patriotisme dalam kalangan masyarakat Malaysia.

Untuk mencapai matlamat perpaduan negara yang kukuh, seluruh masyarakat perlu berganding bahu dan melangkah seiring dengan usaha murni kerajaan melalui dasar-dasar dan rancangan baru. Hubungan masyarakat yang harmoni menjadi tunggak kejayaan untuk menjadikan Malaysia sebagai sebuah negara yang lebih maju, kompetitif dan progresif.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : TUAN CHARLES ANTHONY SANTIAGO
[KLANG]

TARIKH : 7 OKTOBER 2019 (ISNIN)

SOALAN NO. 44

Minta **PERDANA MENTERI** menyatakan status siasatan terhadap dakwaan pemberi maklumat (2018) bahawa kontrak perubatan Kementerian Kesihatan 2013-2016 sebanyak RM3.7 bilion dimonopoli oleh tiga ejen tender utama. Satu laporan berkait dengan isu ini telah dibuat dengan SPRM pada 22 Jun 2018.

JAWAPAN : YB DATUK LIEW VUI KEONG, MENTERI DI JABATAN PERDANA MENTERI

Tuan Yang di-Pertua,

1. Untuk makluman Yang Berhormat Klang, hasil siasatan SPRM mendapati proses perolehan yang diputuskan oleh Lembaga Perolehan Kementerian Kesihatan Malaysia (KKM) adalah mengikut prosedur yang ditetapkan dan pihak KKM menggunakan Prosedur Standard Kerajaan dimana KKM juga membuat rundingan harga dengan agen yang dipilih sebagai langkah penjimatan.
2. Pihak KKM juga telah dipanggil oleh Suruhanjaya Persaingan Malaysia pada 25 Jun 2018 bagi menjawab isu monopoli oleh syarikat pembekalan ubat-ubatan. Tiada monopoli dalam sistem perolehan KKM kerana ia dibuat secara tender terbuka di mana agen yang dilantik prinsipal boleh menyertai tender tanpa had bilangan tender. Daripada 20 agen yang berdaftar dengan KKM hanya satu agen yang gagal memperoleh tender pembekalan ubat-ubatan sepanjang 2013 hingga 2016.
3. Isu ini tiada hubungkait dengan jenayah/salah laku rasuah tetapi sistem dan pentadbiran pemilihan oleh KKM ini telah terbentuk sejak Kerajaan terdahulu. Walau bagaimanapun, pihak KKM boleh merombak dan menilai kembali sistem terdahulu untuk penambahbaikan sistem dan prosedur sedia ada.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : LISAN

DARIPADA : TUAN WONG CHEN [SUBANG]

TARIKH : 7 OKTOBER 2019 (ISNIN)

SOALAN :

Minta **PERDANA MENTERI** menyatakan:

- (a) status pemansuhan Akta Berita Palsu; dan
- (b) nasihatkan mengenai status perlembagaan keupayaan Dewan Negara untuk menyekat pemansuhan tersebut.

JAWAPAN : YB DATUK LIEW VUI KEONG, MENTERI DI JABATAN PERDANA MENTERI

Tuan Yang di-Pertua,

1. Cadangan mengenai pemansuhan Akta 803 telah diluluskan oleh Jemaah Menteri pada 3 Ogos 2018 melalui Rang Undang-Undang (RUU) Antiberita Tidak Benar (Pemansuhan) 2018. RUU tersebut telah dibentangkan di Mesyuarat Pertama, Penggal Pertama, Parlimen Ke-14 yang lalu di mana Bacaan Pertama RUU tersebut telah dilaksanakan pada 8 Ogos 2018. Manakala, Bacaan Kedua dan Ketiga RUU 2018 pula telah dilaksanakan pada 16 Ogos 2018 dan seterusnya RUU tersebut telah diluluskan di Dewan Rakyat pada tarikh yang sama.

NO SOALAN : 45

2. RUU tersebut kemudiannya telah dibentangkan di Dewan Negara pada 27 Ogos 2018 dan 12 September 2018. Walau bagaimanapun, RUU tersebut tidak mendapat sokongan di Dewan Negara yang dibuat melalui undi belah bahagian menurut Peraturan Mesyuarat 45(4) Peraturan - Peraturan Majlis Mesyuarat Dewan Negara, yang keputusannya adalah seramai 21 orang menyokong manakala 28 orang tidak menyokong dan 3 orang tidak mengundi.
3. Susulan penolakan RUU di Dewan Negara, Fasal 2 Perkara 68 Perlembagaan Persekutuan memperuntukkan bahawa Rang Undang-Undang Antiberita Tidak Benar (Pemansuhan) 2019 tersebut hanya boleh dibentangkan untuk dibahaskan di Dewan Rakyat dan Dewan Negara selepas 16 Ogos 2019 iaitu setahun daripada tarikh RUU tersebut diluluskan oleh Dewan Rakyat pada tahun 2018.
4. Oleh yang demikian, Rang Undang-Undang Antiberita Tidak Benar (Pemansuhan) 2019 akan dibentangkan semula dalam Mesyuarat Ketiga, Penggal Kedua Parlimen Ke-14 dengan Bacaan Pertama Rang Undang-Undang Antiberita Tidak Benar (Pemansuhan) 2019 (“RUU 2019”).
5. Dalam hal ini, sekiranya RUU 2019 masih tidak diluluskan oleh Dewan Negara atau diluluskan oleh Dewan Negara dengan pindaan yang tidak dipersetujui oleh Dewan Rakyat, maka RUU 2019 itu hendaklah, melainkan jika diarahkan selainnya oleh Dewan Rakyat, dikemukakan untuk diperkenankan oleh Yang di-Pertuan Agong.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : **LISAN**

DARIPADA : **TUAN SU KEONG SIONG**
[KAMPAR]

TARIKH : **7 OKTOBER 2019 (ISNIN)**

SOALAN

Minta **PERDANA MENTERI** menyatakan perancangan Kerajaan untuk membawa Rang Undang-Undang (RUU) Suruhanjaya Bebas Aduan Salah Laku Polis (IPCMC) 2019. Nyatakan langkah-langkah untuk memastikan dan meningkatkan kebijakan pasukan polis dalam menjamin integriti dan ketelusan PDRM.

JAWAPAN : YB DATUK LIEW VUI KEONG, MENTERI DI JABATAN PERDANA MENTERI

Tuan Yang di-Pertua,

1. Rang Undang-Undang Suruhanjaya Bebas Aduan Salah Laku Polis 2019 (RUU IPCMC) telah dibacakan untuk kali yang pertama di Dewan Rakyat ini pada 18 Julai 2019 yang lalu. Bacaan kali kedua dan ketiga di Dewan Rakyat dijangka pada 7 Oktober 2019 dan kemudian akan dibacakan di Dewan Negara.
2. Akta IPCMC akan berkuat kuasa pada tarikh yang ditetapkan oleh Perdana Menteri melalui pemberitahuan dalam Warta. Bagi IPCMC ini menjadi sebuah badan bebas yang efektif untuk meningkatkan akauntabiliti PDRM, Kerajaan telah mengadakan beberapa siri libat urus (*engagement*) bersama pihak-pihak berkepentingan, pemegang taruh dan media bertujuan untuk memberikan penjelasan dan bertukar-tukar pandangan.
3. Kementerian Dalam Negeri (KDN) dan Polis Diraja Malaysia (PDRM) secara berterusan membuat kajian untuk menambahbaik skim perkhidmatan, elaun-elaun serta kemudahan asas yang lain untuk membantu anggota-anggota PDRM yang berpangkat rendah menangani kos sara hidup yang kian meningkat untuk pertimbangan pihak berwajib.
4. Antara tindakan-tindakan yang telah diambil bagi tujuan mengurangkan bebanan anggota dalam PDRM seperti berikut:-
 - i) Bagi memberikan keselesaan dan mengurangkan bebanan membayar sewa rumah yang tinggi terutama di bandar-bandar besar, PDRM telah diperuntukan sebanyak RM 21,824 juta di bawah objek (OS) 32000 untuk penyelenggaraan kuarters kediaman dan pembaikan pejabat dan kemudahan lain. Disamping itu, tiga projek baru telah diluluskan dalam Rancangan Malaysia Kesebelas (RM Ke-11), *Rolling Plan Pertama* (RP1) dan memberi fokus

kepada penyiapan sebanyak tiga belas projek sambungan tahun 2016 yang melibatkan pembinaan kuarters baru.

- ii) Untuk mengurangkan kos perubatan kepada anggota selain daripada kemudahan rawatan percuma yang diterima di hospital kerajaan, pihak PDRM telah mendirikan Pusat Saringan Kesihatan (PSK) sebagai projek perintis di Bukit Aman bagi anggota mendapatkan rawatan awal atau merawat penyakit yang bukan kronik. Antara pemeriksaan yang dijalankan di Pusat Saringan Kesihatan adalah pemeriksaan berat badan, tekanan darah, kandungan gula dalam darah, *pap smear* dan konsultasi doktor. Pada tahun 2017 seramai 4,269 warga kerja PDRM telah melakukan pemeriksaan. Sehingga 31 Ogos 2018 seramai 1,593 warga kerja PDRM telah mendapat manfaat dari kewujudan pusat Saringan Kesihatan PDRM. Langkah ini dapat mengurangkan kebergantungan kepada klinik swasta untuk mendapatkan rawatan. Inisiatif ini akan dikemukakan kepada pihak kerajaan untuk diperluaskan ke seluruh negara di masa hadapan.
- iii) Menyediakan TASKA di tempat kerja dan kompleks perumahan PDRM bagi mengurangkan kos pengjagaan anak-anak. Disamping itu juga rumah transit turut disediakan bagi kaum keluarga mengiringi pesakit yang menerima rawatan di hospital. Langkah ini juga dapat mengurangkan bebanan kewangan anggota PDRM.
- iv) Menyediakan pusat Hemodialisis kepada anggota PDRM yang mengidap sakit buah pinggang. Sehingga kini terdapat 19 buah pusat telah didirikan diseluruh negara. Rawatan yang diberikan adalah secara percuma.
- v) Menyediakan bantuan kepada anak-anak yatim, anak kurang upaya (OKU), bantuan pelajaran, hadiah perkahwinan dan bantuan khairat kematian melalui tabung kebajikan PDRM dan tabung-tabung lain yang ada dalam PDRM.

- vi) Menyediakan secara percuma pengangkutan pergi dan balik ke sekolah untuk anak-anak pegawai dan anggota Pasukan Gerakan Am (PGA).
5. Skim gaji perkhidmatan PDRM yang digunakan masa kini adalah berdasarkan Rasionalisasi Skim Perkhidmatan Bagi Polis Diraja Malaysia Tahun 2016 (Rujukan: Pekeliling Perkhidmatan Bilangan 2 Tahun 2016). Susulan daripada permohonan Ketua Polis Negara kepada Perdana Menteri baru-baru ini untuk menaikkan gaji Pegawai Polis PDRM dalam usaha meningkatkan taraf hidup dan menjaga kebajikan Pegawai Polis, Jabatan Pengurusan PDRM telah mengadakan bengkel sebagai usaha untuk mendapatkan input-input daripada semua bahagian yang berkenaan dalam merealisasikan permintaan Ketua Polis Negara. Pada 20 Ogos 2019, hasil akhir kertas kerja Permohonan Kenaikan Gaji PDRM 2019 telah diangkat kepada Ketua Setiausaha Kementerian Dalam Negeri untuk semakan dan kelulusan. Cadangan PDRM kini berada di peringkat JPA.
6. Jabatan Integriti dan Pematuhan Standard (JIPS) telah mengambil inisiatif bagi merealisasikan Pemantapan Integriti dan Pematuhan Standard warga PDRM. Antara inisiatif yang telah di ambil ialah:-
- i. Mengeluarkan Manual Pematuhan Standard PDRM yang akan menjadi mekanisma “kawal selia” dalam memastikan pematuhan kepada semua arahan, peraturan dan undang-undang;
 - ii. Mengeluarkan Pelan Integriti 2016-2020 yang bertindak sebagai pemacu budaya organisasi berpaksikan Integriti dan Pematuhan Standard;
 - iii. Mewujudkan kod Etika PDRM bagi memastikan setiap tingkah laku hendaklah berasaskan nilai-nilai murni yang telah diperaku dan diterjemahkan melalui Kod Etika PDRM ini;
 - iv. Menjalankan pemeriksaan dan *integrity testing* ke atas semua warga kerja PDRM di semua penugasan dalam pasukan bagi

memastikan pematuhan kepada undang-undang, peraturan, arahan pentadbiran dan prosedur kerja yang berkuat kuasa serta menepati standard yang ditetapkan;

- v. Mengambil tindakan yang tegas ke atas warga PDRM yang melakukan kesalahan tatatertib sehingga boleh dikenakan hukuman buang kerja atau turun pangkat bagi kesalahan yang serius;
- vi. Mengeluarkan *Lesson learned* bagi memberi iktibar dan pengajaran serta mengelakkan kejadian yang sama berulang di masa akan datang; dan
- vii. Membuat pemantauan dan penyeliaan yang rapi ke atas anggota yang menerima gaji bersih di bawah 40% dan anggota yang bertugas di bahagian yang terdedah kepada gegala rasuah dan salah guna kuasa.
- viii. Menjalankan program-program yang menggunakan pendekatan psikologi dan spiritual serta memberi fokus kepada peranan dalam usaha meningkatkan mutu kehidupan dan integriti warga PDRM melalui Bahagian Agama dan Kaunseling (BAKA).

Sekian, terima kasih.